

**Inunnik paasissutissanik suliarinnittarneq pillugu inatsisip Kalaallit  
Nunaannut atuutilersinneqarnera pillugu peqqussutip eqikkarnera**

Inunnik paasissutissanik suliarinnittarneq pillugu inatsit (inunnik paasissutissat pillugit inatsit), inunnik paasissutissanik suliarinnittarnermut aamma danskit inatsisaanni paasissutissanik taamaattunik pituttorsimanngitsumik paarlaasseqatigiittarnermut atatillugu inuit illersugaanissaat pillugu Europaparlamentip tassanilu siunnersuisoqatigiit peqqussutaat 95/46/EF, 24. oktober 1995-imeersumik piviusunngortitsisoq, inuit pillugit paasissutissat, tamakkiisumik ilaannakortumilluunniit elektroniskiusumik suliarineqarnerannut, kiisalu inuit pillugit paasissutissat nalunaarsuiffimmut ilaanngunneqareersut ilanngunneqartussalluunniit elektroniskiuunngitsumik suliarineqarnerannut pisortat namminersortullu paasissutissanik akisussaasuisa suliarinnittarnerannut maleriagassaqartitsivoq.

Inunnik paasissutissanik suliarinnittarneq pillugu inatsisip Kalaallit Nunaannut atuutilernissaa pillugu peqqussummut missingiutip kingunerissaavaa inatsisip ullpoq 1. oktober 2016-imi Kalaallit Nunaannut atuutilersinneqarnissaa, kisiannili suliarinninnernut atuutereersunut nalunaaruteqarnissaq akuersissutinillu pissarsiniarnissaq ukiunik pingasunik piffissaliussap qaangiutinnginneranni aatsaat pisussaavoq.

Peqqussutissatut missingiut danskit inunnik paasissutissat pillugit inatsisaannut sanilliullugu arlalinnik allaanerussuteqarpoq. Tamatumani pingaartumik allaanerussutit aqqissuinnermut attuumassutillit imaluunniit malittarisassat Danmarkimit allaanerussut, inunnik paasissutissat pillugit inatsisip atorineqarneranut pingaaruteqartut Kalaallit Nunaannut atuuttuunerannik peqquteqartut pineqarput.

Inunnik paasissutissat pillugit inatsimmi tv atorlugu nakkutilliisarneq pillugu kapitali, tak. § 1, imm.8, Kalaallit Nunaannut atuutilersinneqannginnissaa siunnersuutigineqarmat ilanngullugu oqaatigineqassaaq, tassa tv atorlugu nakkutilliisarneq pillugu danskit inatsisaat atuuttoq Kalaallit Nunaannut atuutinngimmat. Tv atorlugu nakkutilliineq atortut digitaliusut (analogiuunngitsut) atorlugit immiunneqartut peqqussummut ilaatinneqarnerat tamatuma kinguneraa, taamaassappallu pisortat oqartussaasuinut namminersortunullu malittarisassat assigiinngitsut atuutissagaluarlutik.

Aammattaaq – Danmarkimi inunnik qarasaasiakkut paasissutissat pillugit inatsisip akerlianik – peqqussut eqqartuussiviit Kalaallit Nunaanni inunnik paasissutissanik suliarinnittarnerannut atuutissanngitsaq peqqussutissatut missingiummi siunniunneqarpoq. Peqqussutissatut missingiutit tusarniaassutigineranut atatillugu inatsisip Kalaallit Nunaanni eqqartuussivinni atuutilersinneratigut suleriaatsimi ajornartorsiutit arlallit paasineqarnerat tamatumunnga pissutaavoq.

Aammattaaq inunnik qarasaasiakkut paasissutissat pillugit inatsimmi § 65-ip assinganik peqqussutissatut missingiut aalajangersagartaqanngilaq, tamatumalu kingunerisaanik nakkutilliisut Kalaallit Nunaanni suliaat pillugit Datatilsyni ukiumoortumik immikkut nalunaarusiortussaannilaq. Datatilsynip Kalaallit Nunaanni sulinera – maannamutut ililluni – ukiumoortumik nalunaarusiami Datatilsynip ullumikkut suliarisartagaani naammaginartumik annertussuseqartillugu eqqartorneqartareenera tamatumunnga tunuliaqutaavoq.

Nalunaarutit, inatsit malillugu saqqummiunneqartut Kalaallit Nunaannut aallaqqaammut atuutilersinneqannginnissaat missilingiummi siunniussaavoq. Tamatuma kingunerisussaavaa inatsisip atuutilersinneqannginnerani isummerfigineqartussaammat nalunaarutit sorliit – inatsimmi inatsisitigut tunngavissaritaasut malillugit aalajangersakkat naapertorlugit – Kalaallit Nunaanni sunniuteqalertussat atuutilersinneqartariaqartariaqarnerisut aamma pisariaqarpat allannguutit suut allannguutigigitillugit.

Kalaallit Nunaanni inunnik paasissutissat suliarineqartarnerat pillugu malittarisassat tamanut atuuttut namminersortut nalunaarsuiffii il.il. pillugit inatsimmi aamma pisortatut oqartussat nalunaarsuiffii pillugit inatsimmi ullumikkut nassaassaammata oqaatigineqassaaq. Malittarisassat taakkuupput missingiut malillugu inunnik paasissutissat pillugit inatsimmi taarserneqartussat. Tamatumunng peqatigitillugu oqaatigineqassaaq, Namminersorlutik Oqartussat Inatsisartut inatsisaatigut inunnik paasissutissat suliarineqartarnerat pillugu malittarisassiorsinnaalissammata, taamaattorli matumani pineqanngilaq naalagaaffimmi oqartussat Kalaallit Nunaanni inunnik paasissutissanik suliarinnittarnerat.

Ulloq 14. april 2016-imi Europa-Parlamentip Europa-Rådilli paasissutissanik illersuineq pillugu peqqussut nalinginnaasoq akuersissutigaa, taassumalu paasissutissanik illersuineq pillugu peqqusut atuuttoq Danmarkimilu inunnik paasissutissat pillugit inatsisip ilarujussua

taarsertussaassavai maj 2018-imiit atuutilersumik. Tamanna peqqussummi pineqartutut inunnik qarasaasiakkut paasissutissat pillugit inatsisip Kalaallit Nunaannut atuutilersinneqarnissaanut kinguneqartussaangilaq.

## MISSINGIUT

### **Inunnik paasissutissat suliarineqartarnerat pillugu inatsisip Kalaallit Nunaannut atuutilersinneqarnera pillugu peqqussut**

UAGUT MARGRETHE AAPPAAT, Guutip Saammaanneranik Danmarkip  
Dronningia, nalunaarpugut:

Inunnik paasissutissat suliarineqartarnerat pillugu inatsit nr. 429, 31. maj 2000-imeersumi § 83<sup>1)</sup> malillugu, inunnik paasissutissanik suliarinnittarneq pillugu inatsit nr. 429, 31. maj 2000-imeersoq, inunnik paasissutissanik suliarinnittarneq pillugu inatsisip, Lovtidendep aamma Ministerialtidendep saqqummersinneqartarneri pillugit inatsisip, nassaat pillugit inatsisip aamma akiitsullit toqqorsigallarnikkut akiitsuiarneqarsinnaatitaanerat pillugu inatsisip (Inunnik paasissutissat nunanut isumaqatigiissummut peqataanngitsunut nuunneqartarnerat, Ministerialtidendep atorunnaarsinneqarnissaa, nassaat il.il. politiinit suliarineqartarnerini pingaarutaasa killilerneqarnissaat) allanngortinneqarnissaat pillugu inatsit nr. 1245, 18. december 2012-imeersukkut allanngortinneqartoq, ima oqaasertalerlugu Kalaallit Nunaannut atuutsinneqassasoq aalajangersarneqarpoq:

#### **Immikkoortoq I**

*Aallarniutitut aalajangersakkat*

#### **Kapitali 1**

*Inatsisip atuuffia*

§ 1. Paasissutissat elektroniskiusut atorlugit imaluunniit inunnik paasissutissanik elektroniskiuungitsunik nalunaarsuiffimmut ilanngunneqareersunik ilanngunneqartussanilluunniit tamakkiisumik ilaannakortumilluunniit suliarinnittarnermi Inunnik paasissutissanik suliarinnittarnermut inatsit atuuppoq.

*Imm. 2.* Aammattaaq elektroniskiuungitsumik aaqqissuussaasumik suliarinninnernut inuunnaat sinnerlugit ingerlanneqartunut aammalu inuit ataasiakkaat inuuneranni aningaasaqarneranniluunniit pissutsit tamanut saqqummiunneqannginnissaannik piimasaqaateqarfiusinnaasut pillugit paasissutissanut attuumassuteqartunut inatsit atuuppoq. Tamatumani inatsimmi kapitali 8 aamma 9-mi maleruagassat ilaatinneqanngillat.

*Imm. 3.* Aammattaaq suliffeqarfiit il.il., tak. imm. 1 aamma 2, pillugit paasissutissanik suliarinninnernut inatsit atuuppoq, taamatut suliarinninneq akiligassat pillugit paasissutissanik suliarinnittartut sinnerlugit ingerlanneqarpat. Taamatuttaaq suliarinninnernut § 50, imm. 1 nr. 2-mi ilaatinneqartunut tamanna atuuppoq.

*Imm. 4.* Kapitali 5 suliffeqarfiit pillugit paasissutissanik suliarinninnernut atuuppoq, tak. Imm. 1.

*Imm. 5.* Pissutsinut imm. 3-mi taaneqanngitsunut atatillugu suliffeqarfiit il.il. pillugit paasissutissanik namminersortut sinnerlugit ingerlanneqartunik suliarinninnernut atatillugu inatsimmi maleruagqusat tamakkiisumik ilaannakortumilluunniit atorqeersinnaanerit inatsisinik atorfitsinernut ministerip aalajangersinnaavaa.

*Imm. 6.* Pissutsinut imm. 4-mi taaneqanngitsunut atatillugu suliffeqarfiit il.il. pillugit paasissutissanik pisortat ingerlatsivii sinnerlugit ingerlanneqartunik suliarinninnernut atatillugu inatsimmi maleruagqusat tamakkiisumik ilaannakortumilluunniit atorqeersinnaanerit ministerimit pineqartumit aalajangerneqarsinnaavoq.

§ 2. Inunnik paasissutissanik suliarinnittarneq pillugu inatsimmi allami maleruagqusat inuup nalunaarsorneqartup inatsisitigut pitsaaneruseqarsumik inissisimaneramik

tungavissiisut inatsimmi matumani maleruaqqusanit salliutinneqassapput.

*Imm. 2.* Paasissutissiisinnaatitaanermik oqaaseqarsinnaatitaanermillu unioqqutitsisoqarsinnaatillugu inatsit atorneqassanngilaq, tak. Inuit Pisinnaatitaaffiisa illersorneqarnerat pillugu Europamiut Isumaqtigiissutaanni aalajangersagaq 10.

*Imm. 3.* Suliarinninnernut nammineq inuttut ingerlataqarnissaq siunertaralugu inuup ingerlataanut inatsit atuutinngilaq.

*Imm. 4.* Suliarinninnernut eqqartuussiviit sinnerlugit ingerlanneqartunut inatsit atuutinngilaq. Inatsimmi kapitali 8-mi aamma §§ 35-37-mi § 39-milu aalajangersakkat suliarinninnernut politiinit aammalu pinerluttulerinermi inatsisinik suliassaqarfimmi unnerluussisussaataasunut aamma atuutinngillat.

*Imm. 5.* Aamma paasissutissanik Inatsisartut suliffeqarfiillu tassunga atasut sinnerlugit suliarineqartunut suliarinninnermut inatsit atuutinngilaq.

*Imm. 6.* Qarasaasiakkut paasissutissaasivinnut, atuagassianik piffissani aalajangersimasuni saqqummersinneqartartunik imaluunniit nipit assilluunniit atorlugit aallakaatitassanik taamaallaat imaqartinneqartunut, tusagassiornermi akisussaaneq pillugu inatsimmi § 1, nr. 1 imaluunniit 2-mi kunngip peqqussutaatigut Kalaallit Nunaannut atuutsinneqartukkut imaluunniit tusagassiornermi akisussaaneq pillugu Inatsisartut inatsisaanni § 1, nr. imaluunniit 2-mi imaluunniit taakku ilaanni atuutinneqartukkut ilaatinneqartunut inatsit atuutissanngilaq saqqummiussanut sanilliullugu allannguuteqartitsinani qarasaasiakkut paasissutissaasivinnut ilanngussisoqarpat. Taamaattorli inatsimmi §§ 41, 42 aamma 64-mi aalajangersakkat atuupput.

*Imm. 7.* Aammattaaq qarasaasiakkut paasissutissaasivinnut, atuagassianik piffissani aalajangersimasuni saqqummersinneqartartunik imaluunniit allatat, assit nipilluunniit atorlugit aallakaatitassianik taamaallaat imaqartinneqartunut, tusagassiornermi akisussaaneq pillugu inatsimmi § 1, nr. 3-mi kunngip peqqussutaatigut Kalaallit Nunaannut atuutinneqartukkut imaluunniit tusagassiornermi akisussaaneq pillugu Inatsisartut inatsisaanni § 1, nr. 3-mi imaluunniit taassuma ilaani atuutinneqartukkut

ilaatinneqartunut inatsit atuutissanngilaq saqqummiussanut sanilliullugu allannguuteqartitsinani qarasiaasiatigoortumik paasissutissaasivimmut ilanngussisoqarpat. Taamaattorli inatsimmi §§ 41, 42 aamma 64-imi aalajangersakkat atuupput.

*Imm. 8.* Atuagassianut saqqummersinneqartunut naqitanillu tigulaakkanut nammineq uninngasuutigisanut tusagassiornermik taamaallaat siunertaqarluni suliarineqartunut inatsit atuutinngilaq. Taamaattorli inatsimmi §§ 41, 42 aamma 64-imi aalajangersakkat atuupput.

*Imm. 9.* Paasissutissanik tusagassiornermik taamaallaat siunertaqarluni suliarineqartunut inatsimmi §§ 41, 42 aamma 64-imi aalajangersakkat kisimik atuupput. Paasissutissanik eqqumiitsuliornermik atuakkiornermilluunniit siunertaqarluni suliarineqartunut aamma tamanna atuuppoq.

*Imm. 10.* Suliarinninnernut politiit sakkutuullu isertortumik paasiniaasarfiisa ingerlataannut inatsit atuutinngilaq.

## **Kapitali 2**

### *Nassuiaatit*

§ 3. Inatsimmi matumani pineqartut ima paasineqassapput:

1) Inunnik paasissutissat:

Inuup kinaassusia paasineqartoq imaluunniit kinaassusersineqarsinnaasoq (nalunaarsorneqartoq) pillugu paasissutissat sulluunniit.

2) Suliarinninneq:

Paasissutissanik elektroniskiusunik atuilluni atuinaniluunniit iliuseqarnerit

suulluunniit imaluunniit iliuseqarnerit arlallit.

3) Inunnik paasissutissanik nalunaarsuiffik:

Inunnik paasissutissat aaqjissuussaasumik katersat suulluunniit tunngavissat aalajangersimasut malillugit pissarsiarineqarsinnaasut, katersugaatit taakku qitiusumik, qitiunngitsumik inissinneqarnerat imaluunniit suliamut aalajangersimasumut nunalluunniit immikkoortuanut agguataarsimanagerat apeqqutaatinnagu.

4) Qarasaasiakkut paasissutissanut akisussaasoq:

Inuk imaluunniit suliaqarfik inatsisitigut akisussaasoq, pisortani oqartussaasoq, suliffeqarfik imaluunniit ingerlatsivik alla sunaluunniit kisimi allanilluunniit peqateqarluni paasissutissanik qanoq siunertaqarluni atortulersuutillu suut atorlugit suliarinninnissamik aalajangiisartaq.

5) Qarasaasiakkut paasissutissanik suliarinnittartaq:

Inuk imaluunniit suliaqarfik inatsisitigut akisussaasoq, pisortani oqartussaasoq, suliffeqarfik imaluunniit ingerlatsivik alla sunaluunniit qarasaasiakkut paasissutissanut akisussaasoq sinnerlugu paasissutissanik suliarinnittartaq.

6) Inuk alla:

Nalunaarsorneqartaq pinnani taammaattorli inuk imaluunniit suliaqarfik inatsisitigut akisussaasoq, pisortani oqartussaasoq, suliffeqarfik imaluunniit ingerlatsivik alla sunaluunniit, qarasaasiakkut paasissutissanut akisussaasoq, qarasaasiakkut paasissutissanik suliarinnittoq aamma inuit qarasaasiakkut paasissutissanut akisussaasumit imaluunniit qarasaasiakkut paasissutissanik suliarinnittumit toqqaannartumik oqartussaaffigineqartut paasissutissanik suliarinninnissamut pisinnaatitaasut.

7) Tigusisussaq:

Inuk imaluunniit suliaqarfik inatsisitigut akisussaasoq, pisortani oqartussaasoq, suliffeqarfik imaluunniit ingerlatsivik alla sunaluunniit paasissutissanik nalunaarfigineqartaq, inuup allap pineqarnera apeqqutaatinnagu. Oqartussaasut immikkut apeqquteqaateqartoqarneranut atatillugu paasissutissanik nalunaarfigineqarsinnaasut tigusisussatut naatsorsuunneqanngillat.

8) Nalunaarsorneqartup akuersilluni nalunaaruteqarnera:

Nammineq piunassuseq naapertorlugu, immikkullu paasitinneqarneraq tunngavigalugu akuersinermik nalunaarneraq sunaluunniit, tamatumani paasissutissat nalunaarsorneqartumut attuumassuteqartut suliarinninnissamut atorneqarnissaannik nalunaarsorneqartumit akuerineqartut.



9) Nuna alla:

Naalagaaffik Det Europæiske Fællesskabimut ilaanngitsoq aamma Inunnik paasissutissanik suliarinnittarnermi aammalu paasissutissanik taamaattunik pituttorsimannngitsunik paarlaasseqatigiittarnermi inuit illersugaanissaat pillugu Det Europæiske Fællesskabip peqqussutaata 95/46/EF-ip, 24. oktober 1995-imeersup assinganik malittarisassaqaqtumik isumaqatigiissuteqarsimannngitsoq.

### Kapitali 3

#### *Inatsisip nunap immikkoortuinut atuuffia*

§ 4. Paasissutissanik suliarinninnernut qarasaasiakkut paasissutissanut Kalaallit Nunaanni pilersinneqartunut akisussaasumit, Kalaallit Nunaata imaluunniit Det Europæiske Fællesskabip iluini ingerlanneqartunut inatsit atuuppoq.

*Imm. 2.* Qarasaasiakkut paasissutissanut akisussaasumut nunami allami inissisimasumut inatsit aamma atuutissaaq

1) Kalaallit Nunaat imaluunniit Det Europæiske Fællesskab aqqutigalugu atortulersuutit paasissutissanik nassitsinermut atorineqarnissaat siunertarineqarnani paasissutissanik suliarinninneq atortulersuutit Kalaallit Nunaanni pigineqartut atorlugit ingerlanneqarpat, imaluunniit

2) nunami allami suliarinninnissaaq siunertaralugu Kalaallit Nunaanni paasissutissanik katersisoqarpat.

*Imm. 3.* Qarasaasiakkut paasissutissanut akisussaasoq imm. 2, nr. 1 naapertorlugu inatsimmi matumani ilaatinneqartoq Kalaallit Nunaanni sinniisussamik toqqaassaaq. Qarasaasiakkut paasissutissanut akisussaasup pineqartup eqqartuussivikkut suliasannngortinneqarnissaanut nalunaarsorneqartup periarfissaa tamatuminnga sunnerneqassangilaq.

*Imm. 4.* Qarasaasiakkut paasissutissanut akisussaasup kina sinniisussatut toqqarneqarnermoq pillugu Datatilsynimut allakkatigut nalunaaruteqassaaq, tak. Imm. 3.

*Imm. 5.* Qarasaasiakkut paasissutissanut akisussaasoq naalagaaffimmi Det Europæiniske Fællesskabimi ilaasumi inissisimasoq Kalaallit Nunaanni paasissutissanik suliarinnippat aamma Inunnik paasissutissanik suliarinnittarnermi aammalu paasissutissanik taamaattunik pituttorsimangitsumik paarlaasseqatigiittarnermi inuit illersugaanissaat pillugu Det Europæiske Fællesskabip peqqussutaani 95/46/EF-ip, 24. oktober 1995-imeersumi suliarinninneq ilaatinneqanngippat inatsit atuutissaaq. Qarasaasiakkut paasissutissanut akisussaasoq naalagaaffimmi imm. 1-imi peqqussutip taaneqartup assinganik malittarisassaqartumik imalinnik Det Europæiske Fællesskabimik isumaqatigiissuteqarsimasumi inissisimasoq Kalaallit Nunaanni paasissutissanik suliarinnippat aammalu suliarinninneq malittarisassani taaneqartuni ilaatinneqanngippat inatsit aamma atuutissaaq.

## **Immikkoortoq II**

### *Suliarinninnermut malittarisassat*

#### **Kapitali 4**

##### *Paasissutissanik suliarinninneq*

§ 5. Qarasaasiakkut paasissutissanik suliarinninnermi pitsaasumik ileqqoqarnissamut naapertuuttumik paasissutissat suliarineqassapput.

*Imm. 2.* Paasissutissanik katersinermi siunertat erseqqissumik nalunaarsukkat suliamullu attuumassuteqartut tunngavigalugit ingerlanneqassaaq kingusinnerusukkullu suliarinninneq siunertanut taakkununnga attuumatinneqassanngilaq. Paasissutissanik kingusinnerusukkut suliarinninneq oqaluttuarisaanermik, kisitsisitigut paasissutissaateqarnermik ilisimatusarnermillu siunertaqartumik taamaallaat ingerlanneqartoq paasissutissanik katersinermi siunertanut naapertuutinningsutut isigineqassaaq.

*Imm. 3.* Paasissutissat suliarineqartut naleqquttuussapput naammassallutillu

paasissutissallu katersorneqarnerini siunertat aammalu paasissutissat kingusinnerusukkut suliarineqarnissaanni siunertat naammassineqarnissaannut piunasaqaatigineqartut sinnerlugit annertussuseqassanatik.

*Imm. 4.* Paasissutissanik suliarinninneq ima aqqissuunneqassaaq paasissutissat pisariaqarfiatigut nutarterneqartassallutik. Aammattaaq paasissutissanik eqqunngitsunik paatsuunganartunillu suliarinnittoqannginnissaa qulakkeerniarlugu pisariaqarfiatigut nakkutilliisoqartassaaq. Paasissutissat eqqunngitsunik paatsuunganartunillu takutitsisut sapinngisamik piaartumik peerneqartassapput iluarsineqartassallutilluunniit.

*Imm. 5.* Paasissutissat katersorneqartut nalunaarsorneqartup kinaassusianik paasinninnissamut periarfissiilluni piffissamit siunertarineqartumut paasissutissanik katersinermi pisariaqartinneqartumit sivisunerusumik paarineqassanngillat.

#### § 6. Paasissutissanik suliarinninneq aatsaat pisinnaavoq

1) nalunaarsorneqartuq taamatut iliortoqarnissaanut erseqqissumik akuersissuteqarsimappat,

2) isumaqatigiissutip nalunaarsorneqartup peqataaffigisaata naammassineqarnissaa imaluunniit taama isumaqatigiissuteqarnissaaq sioqqullugu qinnuteqartup piareersaanerit ingerlanneqarnissaat eqqarsaatigalugit suliarinninnissaaq pisariaqarpat,

3) qarasaasiakkut paasissutissanik akisussaasup inatsisitigut pisussaaffii eqquutsinniarlugit suliarinninnissaaq pisariaqarpat,

4) nalunaarsorneqartup pingaartillugit soqutigisaasa illersorneqarnissaat pillugu suliarinninnissaaq pisariaqarpat,

5) suliassap inuiaqatigiinnit soqutigineqartup ingerlanneqarnissaa pillugu suliarinninnissaaq pisariaqarpat,

6) suliassap pisortat oqartussaasuinit ingerlanneqartartup qarasaasiakkut paasissutissanut akisussaasup allaluunniit paasissutissanik ingerlateqqiffiusussanit suliareqquneqartup ingerlanneqarnissaa eqqarsaatigalugu suliarinninnissaaq pisariaqarpat, imaluunniit

7) qarasaasiakkut paasissutissanut akisussaasoq inulluunniit alla paasissutissanik ingerlatitseqqiffiusussaaq soqutigisaminik nalunaarsorneqartup pingaartinnissaanit pingaaruteqarnerusunik malersuiffiginnissinnaaqqullugu.

*Imm. 2.* Suliffeqarfiup atuisoq pillugu paasissutissanik nittarsaassinermut atorneqartussanngorlugit suliffeqarfimmut allamut tunniusseqqusaanngilaq imaluunniit taama siunertaqarluni suliffeqarfik alla sinnerlugu paasissutissanik atueqqusaanani,

atuisoq tamanna pillugu erseqqissumik akuersisimanngippat.

*Imm. 3.* Taamaattorli pisisartut kikkuunerisa immikkoortiterneqarnissaannut tunngavissaqarniarluni pisisartut pillugit nalinginnaasumik paasissutissat pineqartillugit aamma imm. 1, nr. 7-imi piunasaqaatit naammassineqartillugit akuersissuteqartoqaqqaartinnagu imm. 2-mi taaneqartutut ingerlatitseqqittoqarlunilu atuisoqarsinnaavoq.

*Imm. 4.* Paasissutissanik §§ 7 aamma 8-mi taaneqartunik imm. 3 malillugu ingerlatitseqqittoqarsinnaanngilaq atuisoqarsinnaananiluunniit. Imm. 3 malillugu paasissutissanik aalajangersimasumik ilusilinnik ingerlatitseqqissinnaanermut atuisinnaanermulluunniit inatsisinik atortitsinermut ministeri killilersuutinik allanik aalajangersaasinnaavoq.

§ 7. Naggueqatigiiaanut tunngassuteqarnek imaluunniit inuiannik sorlernik aallaaveqarnek, naalackersuineranut tunngassutillit, upperisamut imaluunniit nammineq aalajangiussatut isummat, suliatigut kattuffeqarnermi attaveqarfiiit imaluunniit peqqissutsikkut kinguaassiuutitigullu iliuutsinut tunngassutilittut pissusillit pillugit paasissutissanik suliarinnittoqassanngilaq.

*Imm. 2.* Imm. 1-imi aalajangersagaq atorneqassanngilaq

1) nalunaarsorneqartoq taama sularinninnissamut erseqqissumik akuersisimappat,

2) pisuni nalunaarsorneqartoq nammineq inatsisilluunniit tunngavigalugit akuersisinnaatinnagu nalunaarsorneqartup inuulluunniit allap pingaartillugit soqutigisaasa illersorneqarnissaat pillugu suliarinninnissaq pingaaruteqarpat,

3) suliarinninneq paasissutissanut nalunaarsorneqartumit saqqummiunneqartunut attuumassuteqarpat, imaluunniit

4) suliarinninnisaq inatsisitigut piunasaqaatit aalajangersarneqarsinnaanissaannut, atuutinniarnissaannut imaluunniit illersorniarnissaannut pisariaqarpat.

*Imm. 3.* Aammattaaq suliatigut kattuffeqarnermi attaveqarfigisat pillugit paasissutissanik suliarinninneq pisinnaavoq qarasaasiakkut paasissutissanut akisussaasup sulinermini inatsisitigut pisussaaffiisa piginnaatitaaffiisaluunniit immikkut ittut malinneqarnissaannut suliarinninnissaq piariaqartinneqarpat.

*Imm. 4.* Pilersitaq, peqatigiiffik allaluunniit nalinginnaasumik kattuffik politikikkut, nammineq isummatigut, upperisatigut suliatigulluunniit siunnerfilik nammineq ingerlatami iluini kattuffiup ilaasortai inuilluunniit kattuffiup siunertai pissutigalugit kattuffimmut akulikitsumik attaveqartartut pillugit paasissutissanik imm. 1-imi taaneqartunik suliarinnissinnaapput. Taamaattorli paasissutissanik taamaattunik

aatsaat ingerlatitseqqittoqarsinnaavoq nalunaarsorneqartoq tamatumunnga akuersilluni erseqqissumik nalunaaruteqarsimappat imaluunniit suliarinninnissaq imm. 2, nr. 2-4 imaluunniit imm. 3-mi ilaatinneqarpat.

*Imm. 5.* Nappaatinik akiuiniarluni pinaveersaartitsinissaq, nappaatinik suussusersinissaq, napparsimasunik paaqqutarinninneq katsorsaanerluunniit imaluunniit nakorsat peqqissutsikkullu sullississutinik aqutsinissaq siunertaralugit paasissutissanik suliarinninnissaq pisariaqartinneqarpat aamma paasissutissanik suliarinninneq peqqinnissaqarfiup iluani sulisumit inatsisit malillugit nipangiussisussaataasumit ingerlanneqarpat imm. 1-imi aalajangersagaq atorneqassanngilaq.

*Imm. 6.* Pisortani oqartussaasup pinerluttulerinermik inatsisinut tunngasutigut suliassaminik isumaginninissaminut suliarinninnissaq pisariaqartippagu imm. 1-imi paasissutissanik taaneqartunik suliarinninneq pisinnaavoq.

*Imm. 7.* Aammattaq inuiaqatigiinni soqutigisat pingaarutillit mianerineqarnissaat pillugu pissutsit tunngavigalugit paasissutissanik suliarinninneq ingerlanneqarpat imm. 1 malinnginneqarsinnaavoq. Nakkutilliinermik oqartussat tamatumunnga akuersissuteqassapput. Suliarinninnermi atugassarititaasunik erseqqinnerusunik aalajangersaasoqarsinnaavoq.

*Imm. 8.* Naalackersuinikkut pissutsit pillugit paasissutissat tamanit pissarsiarineqarsinnaanngitsut edb atorlugu pisortat ingerlatsivianit nalunaarsorneqassanngillat.

§ 8. Pisortat ingerlatsiviat pissutsit pinerluttulerinermik inatsimmut tunngassutillit, inuuniarnikkut ajornartorsiutit annertuut aamma § 7, imm. 1-imi pissutsit saniatigut pissutsit Inunnik attuumassuteqarluinnartut allat pillugit paasissutissanik suliarinnissanngilaq, tamanna oqartussaasup suliassaasa isumagineqarnissaanut pisariaqartinneqanngippat.

*Imm. 2.* Paasissutissat imm. 1-imi taaneqartut allanut ingerlateqqinneqassanngillat. Taamaattorli ingerlatitseqqittoqarsinnaavoq

- 1) ingerlatitseqqinnissaq nalunaarsorneqartumit erseqqissumik akuerineqarsimappat
- 2) ingerlatitseqqinneq inuinnaat pisortalluunniit soqutigisaat, isertuussinissamut pissutaasunit tamatumani aamma paasissutissami pineqartup pingaartinnissaanut pingaaruteqarnerusut isumaginiassappagit,
- 3) ingerlatitseqqinnissaq pisortat ingerlataanni pinngitsoorneqarsinnaassanngippat imaluunniit pisortat aalajangiiffiginninniarnerni piumasaqaataassappat, imaluunniit

4) ingerlatitseqqinnissaq inuup imaluunniit sulliviup pisortanut tunngasunut suliaasaanik ingerlatsiniarnissami pisariaqartinneqassappat.

*Imm. 3.* Ingerlatsivinni oqartussat isumaginninnermut tunngasutigut sulianik ingerlataqartut aatsaat imm. 2, nr. 1 imaluunniit 2-mi piumasagaatit eqquutsinneqarpata imaluunniit suliap suliarineqarnerani ingerlatitseqqinnissaq pisariaqarpat imaluunniit oqartussaasup nakkutilliinnermini suliaaminik ingerlatsisinnaaneranut pisariaqartinneqarpat imm. 1-imi aamma § 7, imm. 1-imi paasissutissanik taaneqartunik ingerlatitseqqissinnaapput.

*Imm. 4.* Namminersortut pissutsit pinerluttulerinermik inatsimmut attuumassutillit, inuuniarnikkut ajornartorsiutit annertuut aammalu § 7, imm. 1-imi pissutsit saniatigut pissutsit Inunnik attuumassuteqarluinnartut allat pillugit paasissutissanik suliarinnissanngillat, nalunaarsorneqartoq tamatumunnga erseqqissumik akuersisimanngippat. Tamatuma saniatigut pissutissalimmik soqutigisaqartunut naleqquttumik iliornissaq pisariaqarpat aamma taama soqutigisaqarneq nalunaarsorneqartup pingaartinneqarnissaanit pingaaruteqarneruppat suliarinnittoqarsinnaavoq.

*Imm. 5.* Paasissutissat imm. 4-mi taaneqartut nalunaarsorneqartoq erseqqissumik akuersiseqqaarnagu ingerlateqqinneqarsinnaanngillat. Taamaattorli akuersisitsisoqaaqqaarnani ingerlatitseqqittoqarsinnaavoq ingerlatitseqqinneq pisortat inuinnaalluunniit soqutigisaat isertuussinissamut pissutaasunit tamatumani nalunaarsorneqartup pingaartinnaaanit pingaaruteqarnerusut isumaginarlugit tamanna pissappat.

*Imm. 6.* Pisunut imm. 1, 2, 4 aamma 5-imi malittarisassiuunneqartunut atatillugu § 7-imi piumasagaatit naammassineqarsimappata paasissutissanik aamma suliarinnittoqarsinnaavoq.

*Imm. 7.* Pinerluttulerinermik inatsit naapertorlugu eqqartuussutit pillugit nalunaarsukkat tamakkiisut taamaallaat pisortat oqartussaasuinut tunniunneqarsinnaapput.

**§ 9.** Paasissutissat § 7, imm. 1 imaluunniit § 8-mi taaneqartut suliarineqarsinnaapput, tamanna inatsisit pillugit paasissutissiisarnermi periutsinik inuiaqatigiinnut annertuumik pingaaruteqartunik ingerlatsinissaq kisiat siunertaralugu pissappat aamma suliarinninnermut periutsit ingerlanneqarnissaannut pingaaruteqarpat.

*Imm. 2.* Paasissutissat imm. 1-imi pineqartut kingusinnerusukkut allamik siunertaqarluni suliarineqassanngillat. Inatsisit pillugit paasissutissiisarnermi periutsinik ingerlatsinissaq kisiat siunertaralugu paasissutissanik suliarinninnernut allanut aamma

tamanna atuuppoq, tak. § 6.

*Imm. 3.* Imm. 1-imi suliarinninnernut taaneqartunut atugassarititaasut erseqqinnerusut nakkutilliinermik oqartussaasunit nalunaarutigineqarsinnaapput. Aammattaaq paasissutissanut § 6-imi taaneqartunut inatsisit pillugit paasissutissiisarnermi periutsinut atatillugu suliarineqartunut tamanna atuuppoq.

**§ 10.** Paasissutissat § 7, imm. 1-imi imaluunniit § -mi taaneqartut suliarineqarsinnaapput inuiaqatigiinnut annertuumik pingaarutilinnik kisitsitigut paasissutissanut ilisimatusarnermulluunniit atatillugu misissuinissaq kisiat siunertarineqarpat.

*Imm. 2.* Paasissutissat imm. 1-imi taaneqartut kisitsisitigut paasissutissanut ilisimatusarnermulluunniit siunertanut allanut atatillugu kingusinnerusukkut suliarineqassanngillat. Aamma paasissutissanik allanik suliarinninnernut kisitsisitigut paasissutissanut ilisimatusarnermulluunniit atatillugu siunertanut tamanna atuuppoq, tak. § 6.

*Imm. 3.* Imm. 1 aamma 2-mi paasissutissat pineqartut nakkutilliinermik oqartussat siumoortumik akuersissuteqarnerisigut inummut allanut aatsaat ingerlateqqinneqarsinnaapput. Nakkutilliinermik oqartussat ingerlatitseqqinnissaq pillugu erseqqinnerusumik piunasaqaateqarsinnaapput.

**§ 11.** Pisortat oqartussaasut erseqqissumik kinaassusersinissaq imaluunniit journalnormumik atuinnissaq siunertaralugu inuup normua pillugu paasissutissanik suliarinnissinnaapput.

*Imm. 2.* Inuinnaat inuup normua pillugu paasissutissanik suliarinnissinnaapput

1) tamatumani inatsit imaluunniit aalajangersakkat inatsit naapertorlugu aalajangersarneqartut malinneqarpata,

2) nalunaarsorneqartoq tamatumunnga erseqqissumik akuersissuteqarsimappat imaluunniit

3) suliarinninneq kisitsisitigut paasissutissanut ilisimatusarnermulluunniit atatillugu siunertanut atugassatut taamaallaat ingerlanneqassaaq imaluunniit taama siunertaqarluni suliffeqarfiup il.il. nalinginnaasumik ingerlanneqarneranut nalinginnaasumik ilaatut inuup normua pillugu paasissutissanik ingerlatitseqqinnissaq pineqarpat aamma ingerlatitseqqinneq nalunaarsorneqartup erseqqissumik kinaassuserneqarnissaanut pingaaruteqarluinnarpat imaluunniit ingerlatitseqqinnissaq pisortat oqartussaasuinit

piumasarineqarpat.

*Imm. 3.* Imm. 2, nr. 3-mi aalajangersagaq apeqqutaatinnagu erseqqissumik akuersisoqarsimatinnagu inuup normuanik tamanut saqqummiussisoqassanngilaq.

**§ 12.** Qarasaasiakkut paasissutissanut akisussaasut nittarsaassinissaq siunertaralugu inuit eqimattakkuutaat pillugit nalunaarsukkanik tunisisut imaluunniit inuk alla sinnerlugu eqimattakkuutaanut taamaattunut allakkanut qatiguuliuussisoq nalunaarutinilluunniit nassitsisoq taamaallaat makkununga atatillugu paasissutissanik suliarinnissinnaavoq

1) ateq, najugaq, suliffik, suliaq, e-postadresse, telefon aamma telefaxnormut,

2) paasissutissat inuussutissarsiummik ingerlataqartunik nalunaarsuiffimmi ilaasut inatsit naapertorlugu imaluunniit aalajangersakkat inatsit naapertorlugu aalajangersarneqartut tamanut saqqummiunneqartussat naatsorsuunneqartut, kiisalu

3) paasissutissat allat nalunaarsorneqartumit taama iliortoqarnissaanik erseqqissumik akuersissuteqarfigineqartut.

*Imm. 2.* Taamaattorli paasissutissat § 7, imm. 1 imaluunniit § 8-mi taaneqartut suliarineqassanngillat, Paasissutissanik aalajangersimasunik suliarinnissinnaatitaanermut killilersuutunik allanik inatsisinik atortitsinermut ministeri aalajangersaasinnaavoq.

**§ 13.** Pisortat oqartussaasui suliffeqarfiillu namminersortut il.il. namminneq telefoniminnit normunut sunut sianertoqarsimanersoq ingerlaannartumik nalunaarsortassanngilaat. Taamaattorli pisuni inuinnaat pisortalluunniit soqutigisaat mianerilluinnarniarlugit tamanna pisariaqalersillugu nakkutilliinermik oqartussaasunit siumoortumik akuersissumik pissarsinerup kingorna nalunaarsuisoqarsinnaavoq. Nakkutilliinermik oqartussat nalunaarsuineri erseqqinnerusumik atugassarititaasunik aalajangersaasinnaapput.

*Imm. 2.* Imm. 1-imi aalajangersagaq atuutissanngilaq inatsimmi allatut aalajangiisoqarsimappat imaluunniit nalunaarasuartaateqarnermik inuttut imminut attuumassutilinnik imaluunniit teknikikkut nakkutilliinermut atatillugu telefonip normui sorliit sianerfigineqarsimanersut pillugu nalunaarsuinerat eqqarsaatigalugu.

**§ 14.** Paasissutissat inatsimmi matumani ilaatinneqartut toqqorsiveqarneq pillugu Inatsisartut inatsisaanni malittarisassat malillugit



toqqorsivimmiitsitassanngortinneqarsinnaapput.

## Kapitali 5

### *Pisortanut akiitsut pillugit paasissutissiisarfinnut ingerlatitseqqittarneq*

§ 15. Pisortanut akiitsut pillugit paasissutissat kapitalimi matumani aalajangersakkat malillugit akiitsulinnik paasissutissiisarfinnut ingerlateqqinneqarsinnaapput.

*Imm. 2.* Paasissutissat § 7, imm. 1 imaluunniit § 8, imm. 1-imi taaneqartut ingerlateqqinneqassanngillat.

*Imm. 3.* Paasissutissat isertuussassat kapitalimi matumani malittarisassat ingerlateqqinneqarpata tamanna pissutigalugu tamanut saqqummiunneqartussatut naatsorsuunneqassanngillat.

§ 16. Pisortanut akiitsut pillugit paasissutissat akiitsulinnik paasissutissiisarfinnut ingerlateqqinneqarsinnaapput

1) inatsit imaluunniit inatsit naapertorlugu aalajangersakkat malinneqassappata imaluunniit

2) akiitsut tamarmiusut akiligassanngorsimappata aammalu 7.500 kr.-it sinnersimappatigit, taamaattorli akiitsut uninngatinneqarnissaat imaluunniit akilersorneqarnissaat pillugu isumaqatigiisummut attuumassuteqassanngillat.

*Imm. 2.* Akiitsut tamarmiusut imm. 1, nr. 2 naapertorlugu akiliisitsiniartarnermik oqartussaamit ataatsimit aquunneqarnissaat piunasaqaataavoq.

*Imm. 3.* Aammattaaq imm. 1, nr. 2 malillugu ingerlatitseqqinnissamut piunasaqaataavoq

1) akiitsut akiliisitsinikkut akilersinniarneqarsinnaassasut aamma akileeqqusissutinik marlunnik akiitsulimmut nassitsisoqarsimassasoq,

2) akiligassanut atatillugu akiliussisoqarsimanngitsoq akiliussiniartoqarsimassanngitsorlu,

3) akiligassat inaarutaasunik eqqartuussutikkut aalajangersarneqarsimassasut imaluunniit

4) akiitsut akiligassanngortut pillugit akiitsullip uppersaataanik pisortat pissarsiaqarsimassasut.

§ 17. Ingerlatitseqqittoqartinnagu akiitsulik oqartussanit tamanna pillugu allakkatigut nalunaarfigineqassaaq. Taama nalunaaruteqarnermit siusinnerpaamik sapaatip akunneri sisamat qaangiunnerini aatsaat ingerlatitseqqittoqassaaq.

*Imm. 2. Imm. 1-imi nalunaarut taaneqartoq makkuninnga imaqassaaq,*

1) paasissutissat qanoq ittut ingerlateqqinniarneqarnersut,

2) akiitsulinnik paasissutissiisarfimmut sorlermut ingerlatitseqqittoqassanersoq,

3) ingerlatitseqqinneq qaqugukkut pissanersoq aamma

4) ingerlatsitseqqinnissaq sioqqullugu akiitsut akilernerqarsimappata imaluunniit uninngatinneqarnissaat nalunaarutigineqarpat imaluunniit akilersuinissaq pillugu isumaqatigiissut malinneqarsimappat ingerlatitseqqittoqassanngitsoq.

§ 18. Pisortanut akiitsut pillugit paasissutissanik akiligassarsianik paasissutissiisarfimmut ingerlatitseqqittarnermi periusissaq pillugu ministeri pineqartoq malittarisassanik erseqqinnerusunik aalajangersaasinnaavoq. Tassunga atatillugu § 16-imi piunasaqaatit taaneqartut saniatigut piunasaqaatit allat naammassineqarsimappata pisortanut akiitsut aalajangersimasut pillugit paasissutissat ingerlateqqinneqarsinnaannginnersut ingerlateqqinneqarsinnaanersulluunniit aalajangerneqarsinnaavoq.

## Kapitali 6

### *Akiitsulinnik paasissutissiisarfitt*

§ 19. Ingerlatitseqqinnissaq (akiliitsulinnik paasissutissiisarfimmut) siunertaralugu aningaasaqarnikkut patajaatsuussusermik akiligassarsisinnaassutsimillu naliliinissamut atatillugu paasissutissanik suliarinninissamik suliaqarnissamik kissaateqartoq suliarinninnissaq sioqqullugu tamanna pillugu Datatilsynimit akuersissummik

pissarsiniassaaq, tak. § 50, imm. 1, nr. 3.

§ 20. Akiitsulinnik paasissutissiisarfii paasissutissanik suussutsimikkut aningaasaqarnikkut patajaatsuussusermik akiligassarsisinnaassutsimillu naliliinissamut pingaarutilinnik taamaallaat suliarinnissinnaapput.

*Imm. 2.* Paasissutissat § 7, imm. 1, aamma § 8, imm. 4-mi taaneqartut suliarineqaqqusaanngillat.

*Imm. 3.* Pissutsit akiligassarsisinnaassuseqannginneq pillugu paasissutissat ukiullu tallimat sinnerlugit pisoqaassusillit suliarineqaqqusaanngillat pisuni ataasiakkaani pisoq pineqartup aningaasaqarnikkut akiliisinnaasusiata akiligassarsisinnaassusiatalu nalilersorneqarnissaanut pingaaruteqartoq ersarissumik paasineqarsimanngippat.

§ 21- Akiitsulinnik paasissutissiisarfii § 28, imm. 1 imaluunniit § 29, imm. 1 naapertorlugit paasissutissat aalajangersakkani taakkunanani taaneqartut inummut paasissutissanik suliarinninnermut attuumassuteqartut pineqartumut nalunaarutigissavaat.

§ 22. Akiligassarsianik paasissutissiisarfii paasissutissat naliliinerillu paasissutissiisarfiup qaammatit kingulliit arfinillit ingerlanerini pineqartoq pillugu ingerlateqqitaasa imarisaat kiisalu pineqartoq pillugu paasissutissat allat piffissap qinnuteqarfiusussap saqqummiunneqarnerani pappiaranngorlugit imaluunniit tusagassiuutit digitaliusut atorlugit uninngasuutigineqartut, tassunga ilanngullugu naliliinerit pigineqartut pillugit nalunaarsorneqartup qinnuteqarneratigut sapaatip akunneri sisamat qaangiutsinnagit paasiuminartunngorlugit sukkulluunniit nalunaarutigissavai.

*Imm. 2.* Tamatuma peqatigisaanik nalunaarsorneqartoq pillugu atortussanik allanik paasissutissiisarfik tigummiaraqpat atortussat suuneri kiisalu nalunaarsorneqartup paasissutissiisarfimmu nammineq saaffiginninnermigut misissorsinnaagai pineqartumut nalunaarutigineqassaaq.

*Imm. 3.* Aammattaaq paasissutissiisarfik paasissutissanik tunineqartut kikkuneri paasissutissallu imm. 1 aamma 2-mi taaneqartut suminngaanneernerinik paasissutissat pigineqartut pillugit paasissutissiissaaq.

*Imm. 4.* Imm. 1-3-mi oqaatigineqartutut paasissutissiisarfiup allakkatigut nalunaaruteqarnissaa nalunaarsorneqartup piumasarisinnaavaa. Allakkatigut nalunaarutinut akiliutissaaq pillugu inatsisinik atortitsinnermut ministeri malittarisassanik

aalajangersaasinnaavoq.

§ 23. Aningaasaqarnikkut patajaatsuussuseq akiligassarsisinnaassuserlu pillugit paasissutissat taamaallaat allakkatigut nalunaarutigineqarsinnaapput, taamaattorli tak. § 22, imm. 1-3. Taamaattorli apeqquteqartup aqqa najugaallu allanneqarpat sivikinnerpaamillu qaammatini arfinilinni paarineqarpat paasissutissiisarfik pisartagaqartunut oqaasiinnakkut assigisaatigulluunniit eqikkaalluni paasissutissiisinnaavoq.

*Imm. 2.* Akiligassarsianik paasissutissiisarfiit saqqummersitaat paasissutissanik eqikkakkanik taamaallaat imaqarsinnaapput aamma inunnt suliffeqarfinnulluunniit paasissutissiisarfimmit nalunaarutininik pisartagaqartunut taamaallaat nassiunneqarsinnaallutik. Saqqummersinneqartut nalunaarsorneqartup inuttut normua pillugu paasissutissanik imaqassanngillat.

*Imm. 3.* Akiitsutigut pissutsit pillugit paasissutissat eqikkakkat taamaallaat ingerlateqqinneqarsinnaapput paasissutissat Statstidendemut attuumassuteqarpata, kapitali 5-imi malittarisassat malillugit pisortat oqartussaasuinit nalunaarutigineqarsimappata imaluunniit paasissutissat akiligassarsiffimmut ataatsimut 1.000 kr. sinnerlugit akiitsunut attuumassuteqarpata aamma akiligassarsiffik akiitsut akiligassanngortut pillugit nalunaarsorneqartumit allakkatigut uppersaammik pissarsisimappat imaluunniit pineqartup eqqartuussivikkut suliassanngortinneqarnissaanut suliniuteqartoqarsimappat. Taamaattorli akiitsunik isumakkeerinissap inaarutaasumik akuersissutigineqarnera pillugu paasissutissat ingerlateqqinneqarsinnaanngillat. Imm. 1 aamma 2-mi malittarisassat taaneqartut akiligassanik siammasinnerusumik naliliissutinik suliarinninnermut atatillugu akiitsutigut pissutsit pillugit paasissutissanik eqikkakkanik ingerlatitseqqittarnermut atuupput.

*Imm. 4.* Inuit ataasiakkaat akiitsui pillugit paasissutissanik eqikkakkanik taamaallaat ingerlatitseqqittoqarsinnaavoq inuit ataasiakkaat pineqartut saniatigut allat aningaasaqarnikkut patajaatsuussusiisa akiligassarsisinnaassusiisalu nalilerneqarnissaannut paasissutissat tunngaviginiarneqassanngippata.

§ 24. Paasissutissat naliliissutilluunniit eqqunngitsut paatsuunganartunillu takutitsisut sapinngisamik piaartumik peerneqarlutilluunniit iluarsineqassapput.

§ 25. Paasissutissaq naliliissutilluunniit eqqunngitsut paatsuunganartunilluunniit takutitsisut taamaaliortoqannginnerani ingerlateqqinneqarsimappata

nalunaarsorneqartumut imaluunniit pisup paasissutissiisarfimmit suli paasineqannginnerani qaammatit arfinillit kingulliit ingerlanerini paasissutissamik naliliissummilluunniit tiguisunut tamanut iluarsineq pillugu paasissutissiisarfik allakkatigut ingerlaannartumik nalunaaaruteqassaaq. Aammattaaq oqaaseqatigiit siulliit malillugit kina nalunaaruteqarfigineqarsimanersoq aamma paasissutissaq naliliissulluunniit suminggaaneersersoq pillugu nalunaarsorneqartoq nalunaarfigineqassaaq.

§ 26. Paasissutissat naliliissutilluunniit eqqunngitsutut paatsuunganartunilluunniit takutitsisutut isigineqartut peerneqarnissaat, iluarsineqarnissaat mattunneqarnissaalluunniit pillugit imaluunniit paasissutissat sularineqaqqusaanngitsut, tak. § 37, imm. 1, peerneqarnissaat pillugu nalunaarsorneqartumit saaffiginnissutit piaartumik aammalu saaffiginnissutit tiguneqarnerata kingorna sapaatip akunneri sisamat qaangiutsinnagit paasissutissiisarfimmit allakkatigut akissuteqarfigineqassapput.

*Imm. 2.* Piiainissamik, iluarsiinissamik mattussinissamilluunniit qinnuteqaat paasissutissiisarfiup ingerlakkumanngippagu paasissutissiisarfimmit akissutit tiguneqarnerata kingorna sapaatip akunneri sisamat qaangiutsinnagit imaluunniit akissuteqarnissamut piffissaliussap imm. 1-mi taaneqartup naanerata kingorna apeqqut nalunaarsorneqartup Datatilsynimut suliassanngortissinnaavaa, tassani piiasoqassanersoq, iluarsiiisuteqartoqassanersoq mattussisoqassanersorluunniit aalajangerneqassalluni. § 25-mi aalajangersagaq taamaaqataanik atuuppoq.

*Imm. 3.* Pisunut imm. 2-mi taaneqartunut atatillugu paasissutissiisarfiup akissutaa apeqqutip Datatilsynimut suliassanngortinneqarsinnaanera taamaaliornissamullu piffissaritinneqartoq pillugu paasissutissanik imaqassaaq.

## Kapitali 7

### *Nunanut allanut paasissutissanik nuussineq*

§ 27. Paasissutissanik nunamut allanut aatsaat nuussisoqarsinnaavoq nunami tassani naammaginartumik illersugaanissaq qulakkeerneqarsimappat, taamaattorli tak. Imm. 3.

*Imm. 2.* Nunami allami naammaginartumik illersugaanissamik naliliinermi pissutsit

nuussinermut attuumassuteqartut tamarmik, tassunga ilanngullugu pingaartumik paasissutissat suussusii, suliarinninnissami siunertarineqartoq tamatumalu sivisussusissaa, nuna paasissutissanik nassitsisoq nunalu tiguisusaaq aamma inatsisitigut malittarisassat, pitsaasumik suleriaaseqarnissamut malittarisassat isumannaallisaatillu nunami allami atuuttut tunngavigineqassapput.

*Imm. 3.* Pisut imm. 1-imi taneqartut saniatigut paasissutissanik nunamut allamut nuussisoqarsinnaavoq

1) nalunaarsorneqartoq erseqqissumik akuersisimappat,

2) nuussinissaq nalunaarsorneqartup imaluunniit qarasaasiakkut paasissutissanut akisussaasup akornanni isumaqatigiissutip eqquutsinneqarnissaanut pisariaqartinneqarpat imaluunniit taama isumaqatigiissuteqarnissaq sioqqullugu atortulersuutit nalunaarsorneqartup qinnuteqarneratigut aalajangerneqartut ingerlanneqarnissaannut pisariaqartinneqarpat,

3) nuussinissaq isumaqatigiissutip nalunaarsorneqartup soqutiginninneratigut qarasaasiakkut paasissutissanut akisussaasup allallu akornanni atsiorneqarnissaanut ingerlanneqarnissaanulluunniit pisariaqartinneqarpat,

4) nuussinissaq inuiaqatigiinnit soqutigineqartoq pingaarutilik illersorniarlugu inatsilluunniit imaluunniit inatsit naapertorlugu aalajangersakkat malinneqarnissaannut pisariaqartinneqarpat imaluunniit inatsisitigut piumasaaqatit aalajangersarneqarsinnaanissaannut, atuutsinniarnissaannut imaluunniit illersorniarnissaannut pisariaqartinneqarpat,

5) nalunaarsorneqartup pingaartillugit soqutigisai illersorniarlugit nuussinissaq pisariaqartinneqarpat,

6) nuussineq nalunaarsuiffimmit inatsit imaluunniit inatsit naapertorlugu aalajangersakkat malillugit tamanit takuneqarsinnaatitaasumit imaluunniit inunnit tamatumunnga soqutiginnillutik takunnissinnaatitaanermut uppersaatissaqartunit takuneqarsinnaatitaasumit nuussineruppat, kikkunnilluunniit takunnissinnaatitaanermut piumasaaqatit inatsimmi aalajangersarneqartut pisuni immikkut ittuni eqquutsinneqarsimatillugit,

7) pissutsinik pillagaassutaasinnaasunik pinaveersaartitsinissaq, misissuinissaq malersuinissarlu aamma eqqartuussummik naammassinninnissaq aammalu eqqartuussutitut inatsisit malillugit malersuinissaq pillugu suliani pasilligaasunik, takunnissimasunik allanilluunniit illersuinissaq eqqarsaatigalugu nuussinissaq pisariaqartinneqarpat imaluunniit

8) pisortani isumannaatsuunissaq, naalagaaffimmik illersuinissaq imaluunniit naalagaaffimmi isumannaatsuunissaq eqqarsaatigalugit nuussinissaq

pisariaqartinneqarpat.

*Imm. 4.* Imm. 3-mi pisut taaneqartut saniatigut nunamut allanut imm. 1-imik naammassinninngitsumut paasissutissanik nuussisoqarnissaa nakkutilliinermi oqartussat akuerisinnaavaat qarasaasiakkut paasissutissanut akisussaasoq nalunaarsorneqartut pisinnaatitaaffiisa illersorneqarnissaannut naammaginartumik qularnaveeqqusiippat. Nuussinermi atugassarititaasunik erseqqinnerusunik aalajangersaasoqarsinnaavoq.

*Imm. 5.* Paasissutissat nunanut allanut nuunneqarsinnaapput imm. 4, oqaaseqatigiit siulliit malillugit akuersissutertaqanngitsumik, isumaqatigiissutit, isumaqatigiissutini assigiiakkani aalajangersakkanut naapertuuttut Europakommissionimit akuersissutaasut tunngavigalugit.

*Imm. 6.* Inatsimmi matumani malittarisassat imm. 1, aama 3 malillugit nunanut allanut paasissutissanik nuussinernut aammattaaq atuupput.

### **Immikkoortoq III**

#### *Nalunaarsorneqartut pisinnaatitaaffii*

### **Kapitali 8**

#### *Nalunaarsorneqartumut paasissutissiisussaataaneq*

§ 28. Nalunaarsorneqartoq pillugu paasissutissanik katersinermi qarasaasiakkut paasissutissanut akisussaasoq taassumaluunniit sinniisua makku pillugit nalunaarsorneqartumut nalunaaruteqassapput:

- 1) Qarasaasiakkut paasissutissanut akisussaasup taassumalu sinniisuata kinaassusiat.
- 2) Suliarinninnermi paasissutissanik atuiffiusumi siunertat.
- 3) Paasissutissat allat tamarmik, pissutsit immikkut ittut paasissutissanik katersinermik tunngavillit eqqarsaatigalugit nalunaarsorneqartup soqutigisaminik

isumaginninnissaanut pisariaqartinneqartut, soorlu:

a) Tigusisussat kikkuuneri.

b) Apeqqutigineqartunut pinngitsoorani imaluunniit nammineq piumassuseq naapertorlugu akissuteqarfigineqassanersut kiisalu akissuteqanngikkaanni kinguneritinneqarsinnaasut.

c) Paasissutissat nalunaarsorneqartumut attuumassuteqartut pillugit takunnissinnaatitaaneq iluarsiiinnaanerlu pillugit malittarisassat.

*Imm. 2.* Nr.1-3-mi paasissutissat taaneqartut nalunaarsorneqartumit ilisimaneqareerpata imm. 1-imi aalajangersagaq atuutissanngilaq.

§ 29. Paasissutissat nalunaarsorneqartumit pissarsiarineqarsimatinnagit imaluunniit paasissutissat katersorneqartut inummut allamut ingerlateqqinneqarnissaat aalajangerneqarsimatillugu kingusinnerpaamik paasissutissat ingerlateqqinneqalerneranni qarasaasiakkut paasissutissanut akisussaasoq imaluunniit nalunaarsuineri taassuma sinniisua nalunaarsorneqartumut makku pillugit nalunaaruteqarnissaminut pisussaataapput:

1) Qarasaasiakkut paasissutissanut akisussaasup taassumalu sinniisuata kinaassusiat.

2) Suliarinninnermi paasissutissanik atuiffiusumi siunertarineqartut.

3) Paasissutissat allat tamarmik, pissutsit immikkut ittut paasissutissanik katersineri tunngavigineqartut eqqarsaatigalugit nalunaarsorneqartup soqutigisaminik isumaginninnissaanut pisariaqartinneqartut, soorlu:

a) Paasissutissat qanoq ittut pineqarnersut.

b) Tigusisussat kikkuuneri.

c) Apeqqutigineqartunut pinngitsoorani imaluunniit nammineq piumassuseq naapertorlugu akissuteqarfigineqassanersut aamma akissuteqanngikkaanni kinguneritinneqarsinnaasut.

*Imm. 2.* Nalunaarsorneqartup paasissutissat nr. 1-3-mi taaneqartut ilisimareerpagit imaluunniit nalunaarsuineq ingerlatitseqqinnerluunniit inatsimmi imaluunniit aalajangersakkani inatsit naapertorlugu aalajangersarneqartuni erseqqissumik aalajangersarneqarsimappat imm. 1-imi aalajangersagaq atuutissanngilaq.

*Imm. 3.* Aammattaaq nalunaarsorneqartoq nalunaarfigineqarsinnaanngitsoq immaqaluunniit nalunaarsorneqartup nalunaarfigineqarnissaa ajornakusoortoq



paasineqarpat imm. 1-imi aalajangersagaq atuutissanngilaq.

**§ 30.** Nalunaarsorneqartup paasissutissanik paasitinneqarnissaminik soqutiginninnera inuinnaat soqutigisaasa mianerilluinnarneqarnissaannit, tassunga ilanngullugu nalunaarsorneqartup nammineq mianerineqarnissaanit pingaarnerunngitsutut isigineqarpat § 28, imm. 1 aamma § 29, imm. 1-imi aalajangersakkat atuutissanngillat

*Imm. 2.* § 28, imm. 1 aamma § 29, imm. 1-imi aalajangersakkat aamma malinnginneqarsinnaapput nalunaarsorneqartup paasissutissanik paasitinneqarnissaminik soqutiginninnera pisortat soqutigisaasa mianerineqarluinnarnissaannit pingaamerunngitsutut isigineqarpat, tassunga ilanngullugu pingaartumik makku mianerineqarnissaat eqqarsaatigalugu

- 1) naalagaaffiup isumannaatsuunissaa,
- 2) sakkutooqarneq,
- 3) pisortat isumannaatsuunissaat,
- 4) pinerluttulerinermik suliani pinaveersaartitsineq, misissuineq malersuinissarlu imaluunniit inuussutissarsiutinut inatsisitigut maleruagassiuunneqartuni ileqqorissaarnissamut malittarisassanik unioqquitsinermut atatillugu,
- 5) Kalaallit Nunaanni, naalagaaffimmi Den Europæiske Unionimi ilaasortami imaluunniit Den Europæiske Unionimi aningaasaqarnikkut aningaasalersuinikkullu soqutigisat pingaarutillit, tassunga ilanngullugit nunat allat aningaasaannut, missingersuutinut akileraartarnermullu attuumassutillit, aamma
- 6) misissuinermi, nakkulliinermi malittarisassiuinermilu suliat, tassunga ilanngullugit nr. 3-5-imi suliassaqaqarfinni taaneqartuni pisortat oqartussaasuisa ingerlatsinerata ilaatut suliat ingerlanneqarallartut.

## Kapitali 9

*Nalunaarsorneqartup takunnissinnaatitaanera*

§ 31. Inuk qinnuteqaammik saqqummiussaqqarpap pineqartoq pillugu paasissutissanik suliarinnittoqarneranik qaraasaasiakkut paasissutissanut akisussaasup pineqartoq nalunaarfigissavaa. Paasissutissanik taamaattunik suliarinnittoqarpap nalunaarsorneqartoq makku pillugit paasiuminartumik nalunaarfigineqassaaq.

1) paasissutissat sorliit suliarineqarnerisut,

2) suliarinninnermi siunertaq,

3) paasissutissanik tiguisussat kikkuuneri aamma

4) paasissutissat taakku sumit pissarsiarineqarnerannik paasissutissat pissarsiarineqarsinnaasut.

*Imm. 2.* Imm. 1-imi taaneqartutut qinnuteqaatit qarasaasiakkut paasissutissanut akisussaasumit piaartumik akissuteqarfigineqassapput. Qinnuteqaatit tiguneqarneranik sapaatit akunneri sisamat qaangiutsinnagit akissuteqartoqanngippat tamatumunnga pissutaasoq aamma qaqugu aalajangiinissap naatsorsuutigineqarneranik qarasaasiakkut paasissutissanut akisussaasoq pineqartumut nalunaaruteqassaaq.

§ 32. § 30-mi aalajangersakkat taamatuttaaq assinganik atorneqassapput.

*Imm. 2.* Paasissutissat pisortat ingerlatsivianni allaffissornikkut sulianik ingerlatsinermut atatillugu suliarineqartut pisortat ingerlatsinerat pillugu paasitinneqarsinnaatitaanermut inatsimmi § 2 –mi kiisalu §§ 7-11 aamma 14-imi malittarisassat kunnigip peqqussutaatigut Kalaallit Nunaannut atuutsinneqartut imaluunniit pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni § 2, kiisalu § 7-11 aamma 14-imi malittarisassat malillugit paasitinneqarsinnaatitaaneq assigalugu ilaatinneqanngissinnaapput.

*Imm. 3.* Paasissutissat ilisimatusarnermi siunertanut atatillugu taamaallaat suliarineqarpata imaluunniit paasissutissat piffissap kisitsisitigut paasissutissanik suliarinninnermut pisariaqartinneqartup taamaallaat nalaani uninngatinneqartillugit § 31, imm. 1-imi aalajangersagaq atorneqassanngilaq.

*Imm. 4.* Pinerluttulerinermik inatsimmi paasissutissanut pisortat ingerlatsivii sinnerlugit suliarineqartunut atatillugu § 31, imm. 1 malillugu paasissutissanik pisinnaatitaanerup atuutinnginnissaanut inatsisinik atortitsinermut ministeri aalajangersaasinnaavoq, taamaaliornikkut, tak. tassunga atatillugu § 30, nalinginnaasumik paasitinneqarsinnaatitaanermik qinnuteqaatit itigartinneqartariaqarnerannik kinguneqartussat § 32, imm. 1-imi aalajangersagaq isigineqartariaqarpoq.

§ 33. Inuk nalunaarsorneqartoq § 31, imm. 1 malillugu nalunaarfigineqartoq

nalunaarutip kingulliup kingorna aatsaat qaammatit arfinillit qaangiunnerini nutaamik nalunaarfġineqarnissaminik piunasaqaateqarsinnaavoq, tamatumunnga immikkut soqutigisanut akuersissuteqartoqanngippat.

§ 34. § 31, imm. 1 naapertorlugu nalunaaruteqarnerit qinnuteqartoqartillugu allaganngorlugit tunniunneqassapput. Taamaattorli pisuni nalunaarsorneqartoq mianerineqartariaqartillugu paasissutissat imaat pillugit oqaasiinnakkut nalunaaruteqartoqarsinnaavoq.

*Imm. 2.* Nalunaarutigineqartunut suliffeqarfinnut namminersortunut il.il. allakkatigut tunniunneqartunut akiliutit pillugit malittarisassanik inatsisinik atortitsinermut ministeri aalajangersaasinnaavoq.

## Kapitali 10

### *Pisinnaatitaanerit allat*

§ 35- Nalunaarsorneqartup paasissutissat imminut attuumassutillit suliarineqarnissaat pillugu qarasaasiakkut paasissutissanut akisussaasumut sukkulluunniit maalaaruteqarsinnaavoq.

*Imm. 2.* Imm. 1 malillugu maalaaruteqartoqarsinnaatitaappat paasissutissat pineqartut suliarinninnermut ilaatinneqarunnaassapput.

§ 36. Atuisoq tamatumunnga maalaarummik saqqummiussaqqarpat suliffeqarfiup nittarsaassinissaq siunertaralugu pineqartoq pillugu paasissutissat suliffeqarfimmut allamut saqqummiussinnaanngilai imaluunniit taama siunertaqarluni suliffeqarfik alla sinnerlugu paasissutissat atorsinnaanagit.

*Imm. 2.* Nittarsaassinissaq siunertaralugu suliffeqarfiup atuisoq pillugu paasissutissanik suliffeqarfimmut allamut ingerlatitseqqinnginnermini imaluunniit taama siunertaqarluni suliffeqarfik alla sinnerlugu paasissutissanik atuinnginnermini suliffeqarfiup imm. 1 malillugu maalaaruteqarsinnaatitaaneq pillugu erseqqissumik paasiuminartumillu nalunaaruteqassaaq. Tamatuma peqatigisaanik atuisoq sapaatip akunneri marluk ingerlaneranni pisariitsumik maalaaruteqarnissamut periarfissinneqassaaq. Maalaaruteqarnissamut piffissaq naatinnagu paasissutissat

ingerlateqqinneqassanngillat.

*Imm. 3.* Suliffeqarfik maalaarutip suliarineqarneranut akileeqqusisinnaangilaq.

§ 37. Paasissutissat eqqunngitsutut paatsuunganartunillu takutitsisutut paasineqartut imaluunniit taamaaqataanik inatsimmut inatsilluunniit naapertorlugu aalajangersakkanut akerliusumik suliarineqartut inuk nalunaarsorneqartoq tamanna pillugu qinnuteqaammik saqqummiussaqqarpat qarasaasiakkut paasissutissanut akisussaasup paasissutissat iluarsissavai, piissavai mattullugilluunniit.

*Imm. 2.* Paasissutissat ingerlateqqinneqartut imm. 1 naapertorlugu iluarsineqarnerat, peerneqarnerat mattunneqarneralluunniit pillugu qarasaasiakkut paasissutissanut akisussaasup inuk alla nalunaaruteqarfigissavaa tamanna pillugu inuk nalunaarsorneqartoq qinnuteqaammik saqqummiussaqqarpat. Taamaattorli nalunaaruteqarnissaq periarfissaanngitsoq immaqaluunniit ajornakusoortoq paasineqarpat tamanna atuutissanngilaq.

§ 38. Nalunaarsorneqartup akuersissutini uterteqqissinnaavaa.

§ 39. Inuk nalunaarsorneqartoq tamatumunnga akerliuppat qarasaasiakkut paasissutissanut akisussaasup nalunaarsorneqartoq aalajangikkanik inatsisitigut sunnuteqartussanik imaluunniit pineqartumut annertuumik sunnuteqartussanik aamma inuttut atukkat aalajangersimasut nalilersorniarlugit paasissutissanik qarasaasiakkut elektroniskiusumik suliarinninneq kisiat tunngavigalugu aalajangikkanik malinninnissaa inassutigisinnaangilaa.

*Imm. 2.* Imm. 1-imi aalajangersagaq atuutissanngilaq

1) aalajangigaq pineqartoq isumaqatigiissuteqarnissap ilaatut imaluunniit isumaqatigiissutip naammassineqarnissaanut atasumik aalajangerneqarpat, nalunaarsorneqartup isumaqatigiissuteqarnissaq isumaqatigiissutilluunniit naammassineqarnissaa pillugu qinnuteqaataa malinneqarsimappat imaluunniit nalunaarsorneqartup pissutilimmik soqutigisaata illersorneqarnissaanut naleqquttumik atugassaqartitsisoqarsimappat imaluunniit

2) aalajangigaq pineqartoq nalunaarsorneqartup pissutilimmik soqutigisaasa illersorneqarnissaat pillugu inatsimmik aalajangersakkanik imalimmik tunngaveqarpat.

*Imm. 3.* Imm. 1-imi taaneqartutut aalajangiinermi malittarisassat sorliit tunngavigineqarsimanersut pillugu qarasaasiakkut paasissutissanut akisussaasumit

nalunaarsorneqartoq sapinngisamik piaartumik tunngavissaqanngitsumillu kinguarsaanertaqanngitsumik paasitinneqarsinnaatitaavoq. § 30 aamma assinganik atuuppoq.

§ 40. Nalunaarsorneqartup paasissutissat imminut attuumassuteqartut suliarineqarnerat pillugu nakkutilliinermi oqartussaasumut naammagittaalliorsinnaavoq.

## **Immikkoortoq IV**

### *Isumannaassuseq*

## **Kapitali 11**

### *Suliarinninnermi isumannaassuseq*

§ 41. Inuit, suliffeqarfiit il.il. qarasaasiakkut paasissutissanut akisussaasup imaluunniit qarasaasiakkut paasissutissanik suliarinnittartup ataani sulianik ingerlatsisut aamma paasissutissanik pissarsisinnaatitaasut inatsimmi inatsilluunniit naapertorlugu aalajangersakkat malillugit allanik aalajangersaasoqarsimanngippat qarasaasiakkut paasissutissanut akisussaasumit ilitsersorneqarluni aatsaat taakkuninnga suliarinnissinnaapput.

*Imm. 2.* Ilitsersuineq imm. 1-imi taaneqartoq tusagassiortutut kiffaanngissusermik killilersuissanngilaq imaluunniit eqqumiitsuliorluni atuakkiorluniluunniit tunisassiap pinngortinneqarnissaanut akimmiffiussanani.

*Imm. 3.* Paasissutissat nalaatsornermik imaluunniit inatsisinik unioqqutsisisoqarneratigut suujunnaarsinneqarsinnaanerit, annaaneqarsinnaanerit ajorseriaateqarsinnaaneralluunniit akiorniarlugu kiisalu allanit susassaqaanngitsunit ilisimaneqalersinnaanerit, atornerlunneqarsinnaanerit allatulluunniit inatsimmut akerliusumik passunneqarsinnaanerit akiorniarlugu teknikikkut aaqqıssuussaanicullu isumannaallisatınik pisariaqartunik qarasaasiakkut paasissutissanut akisussaasoq

aalajangiissaaq. Qarasaasiakkut paasissutissanik suliarinnittartunut tamanna aamma atuuppoq.

*Imm. 4.* Paasissutissanut pisortat ingerlatsiviat sinnerlugu suliarineqartunut aamma takornartanut pissaanilinnut immikkut soqutigineqartunut atatillugu sorsuttoqalissagaluarpat assigisaanilluunniit pisoqassagaluarpat peerneqarnissaannut suujunnaarsinnissaannullu periarfissiisunik aalajangiisoqassaaq.

*Imm. 5.* Isumannaallisaatit imm. 3-mi taaneqartut pillugit inatsisinik atortitsinermut ministeri malittarisassanik erseqqinnerusunik aalajangersaasinnaavoq.

**§ 42.** Qarasaasiakkut paasissutissanut akisussaasup suliarinninneq qarasaasiakkut paasissutissanik suliarinnittartumut tunniuppagu qarasaasiakkut paasissutissanik suliarinnittartup § 41, imm. 3-5-imi teknikikkut aaqqissuussaankullu isumannaallisaatinik taaneqartunik aalajangiisinnaanissaa qarasaasiakkut paasissutissanut akisussaasup qulakkiissavaa aamma tamatuma pinissaa nakkutigissallugu.

*Imm. 2.* Qarasaasiakkut paasissutissanik suliarinnittartoq suliarinnissatillugu tamanna illuatungeriit akornanni allakkatigut isumaqatigiissut naapertorlugu pissaaq. Isumaqatigiissummi allassimassaaq qarasaasiakkut suliarinnittartoq qarasaasiakkut paasissutissanut akisussaasumit ilitseruutit malillugit taamaallaat iliuuseqassasoq aamma § 41, imm.3-5-imi malittarisassat qarasaariakkut paasissutissanik suliarinnittartup suliarinninneranut aamma atuuttut ilanngullugit. Qarasaasiakkut paasissutissanik suliarinnittartoq naalagaaffimmi Den Europæiske Unionimi ilaasortaasumi pilersinneqarsimappat isumaqatigiissummi allassimassaaq naalagaaffimmi Den Europæiske Unionimi ilaasortaasumi qarasaasiakkut paasissutissanik suliarinnittartup inissisimaffigisaani isumannaallisaatit pillugit aalajangersakkat inatsimmi aalajangersarneqartut tassunga atuutissasut.

## **Immikkoortoq V**

### *Nalunaarutiginnittarneq*

## **Kapitali 12**

*Suliarinninnernik pisortat ingerlatsiviannit ingerlanneqartunik  
nalunaarutiginnittarneq*

§ 43. Paasissutissanik suliarinninnermik pisortat ingerlatsiviannit ingerlanneqartussanik aallartitsinnginnermi qarasaasiakkut paasissutissanut akisussaasoq imaluunniit taassuma sinniisua Datatilsynimut nalunaarutiginnissapput, taamaattorli tak. § 44. Qarasaasiakkut paasissutissanut akisussaasoq oqartussaasut inuinnaalluunniit allat nammineq sinnerluni nalunaaruteqarnissamut piginnaatissinnaavai.

*Imm. 2.* Nalunaarutiginninneq makku pillugit paasissutissanik imaqassaaq:

1) Qarasaasiakkut paasissutissanut akisussaasup, taassuma sinniisorisinnaasaa immaqalu qarasaasiakkut paasissutissanik suliarinnittartup aqqa najugaallu.

2) Suliarinninnerup taaguutaa siunertarisaalu.

3) Suliarinninnerup nalinginnaasumik nassuiaatigineqarnera.

4) Nalunaarsorneqartut kikkuunerinik aamma paasissutissat taakkununga attuumassutillit suussusii pillugit nassuiaat.

5) Tiguisisussat imaluunniit tiguisisussat kikkuuneri paasissutissanik nuussivigineqarsinnaasut.

6) Paasissutissat nunamut allamut nuunneqalersaartut.

7) Suliarinninnermi isumannaatsuunissaq pillugu atortulersuutit aallartinneqartut nalinnginnaasumik nassuiarneqarnerat.

8) Piffissaq suliarinninnerup aallartiffia.

9) Piffissaq paasissutissat peerneqarfiat.

§ 44. Paasissutissanik isertuussassaangitsunik suliarinninneq § 43-mi malittarisassani ilaatinneqanngillat, taamaattorli tak. imm. 2. Aammattaaq nalunaarutiginneqqaarani suliarinninnermit taamaattumut ilaatinneqarsinnaapput kinaassuseq pillugu paasissutissat, tassunga ilanngullugu inuttut normu aamma pisortat oqartussaasuinut tassangaanniillu akiliutit pillugit paasissutissat, § 45, imm. 1-imi taaneqartutut suliarinninneq pineqanngippat.

*Imm. 2.* Suliarinninnerit imm. 1-imi taaneqartut pillugit malittarisassanik

erseqqinnerusunik inatsisinik atortitsinermut ministeri aalajangersaasinnaavoq.

*Imm. 3.* Aammattaaq inatsit naapertorlugu imaluunniit malittarisassat inatsit naapertorlugu atortussanngortinneqartut naapertorlugit nalunaarsuiffimmik ingerlatsinissaq kisiat siunertaralugu suliarinninnerit tamanut saqqummiussiviusartussatut tamanillu pissarsiarineqarsinnaasutut naatsorsuussaasut § 43-mi malittarisassani ilaatinneqanngillat.

*Imm. 4.* Paasissutissanik suliarinninnerit aalajangersimasut § 43-mi aalajangersakkami ilaatinnginnissaat pillugu inatsisinik atortitsinermut ministeri malittarisassanik aalajangersaasinnaavoq. Taamaattorli suliarinninnerit § 45, imm. 1-imi taaneqartut ilaatinneqanngillat.

**§ 45.** Suliarinninnerup § 43-mi nalunaaruteqartussaataitanermut ilaatinneqartup aallartinneqannginnerani Datatilsynimit oqaaseqaammik pissarsiniartoqaqqaassaaq

1) suliarinninnermi paasissutissat § 7, imm. 1 aamma § 8, imm. 1-imi taaneqartut ilaatinneqarpata,

2) inatsisit pillugit paasissutissiisarnermi periutsit ingerlanneqarnissaat siunertaralugu suliarinninneq taamaallaat ingerlanneqassappat,

3) ilisimatusarnermik imaluunniit kisitsisitigut paasissutissanik siunertaqarluni suliarinninneq taamaallaat ingerlanneqassappat imaluunniit

4) nakkutilliinissamik siunertaqarluni paasissutissanik sanilliussiniarluni ataatsimoortumilluunniit ingerlatsiniarluni suliarinnittoqassappat.

*Imm. 2.* Imm. 1-imi taaneqartut saniatigut suliarinninnerit allat aallartinneqannginneranni Datatilsynimit oqaaseqaammik pissarsiniartoqarnissaa pillugu inatsisinik atortitsinermut ministeri malittarisassanik aalajangersaasinnaavoq.

**§ 46.** Paasissutissani § 43, imm. 2-mi taaneqartuni allannguutit aallartinneqannginnerini nakkutilliisunut nalunaaruteqartoqaqqaassaaq. Aallannguutit annikinnerusumik pingaarutillit kingusinnerusukkut nalunaarutigineqarsinnaapput, taamaattorli aallartinneqarnerannit kingusinnerpaamik sapaatip akunneri sisamat qaangiutsinnagit.

*Imm. 2.* Paasissutissat § 43, imm. 2-mi taaneqartut allannguutaasa aallatinnginnerini suliarinninnermik nalunaarutiginninnernut § 45, imm. 1 imaluunniit 2-mi ilaatinneqartunut atatillugu nakkutilliisunit oqaaseqaammik pissarsiniartoqaqqaassaaq. Allannguutit annikinnerusumik pingaarutillit taamaallaat



nalunaarutigineqassapput. Kingusinnerusukkut nalunaarutiginnittoqarsinnaavoq, taamaattorli aallartinneqarnerannit kingusinnerpaamik sapaatip akunneri sisamat qaangiutinnginneranni.

§ 47. Pisuni qarasaasiakkut paasissutissanik akisussaaffiup Kalaallit Nunaanni oqartussaasumut appasinnerusumik inissisimasumut tunniunneqarnerani suliarinninnerullu ingerlanneqarnissaa nakkutilliisunit akuerineqarsinnaangippat suliaq Kalaallit Nunaanni ministerimut susassaqartumut saqqummiunneqassaaq, taannalu suliami aalajangiissalluni. Pisuni qarasaasiakkut paasissutissanik akisussaaffiup naalagaaffimmi oqartussaasumut tunniunneqarnerani suliarinninnerullu ingerlanneqarnissaa nakkutilliisunit akuerineqarsinnaangippat suliaq Danmarkimi ministerimut susassaqartumut saqqummiunneqassaaq, taannalu suliami aalajangiissalluni.

*Imm. 2.* Suliarinninnerup Kalaallit Nunaanni kommunimi oqartussaasumit ingerlanneqarnissaa nakkutilliisunit akuerineqarsinnaangippat suliaq Kalaallit Nunaanni ministerimut kommuninut attuumassutilinnik akisussaasumut saqqummiunneqassaaq, taannalu suliami aalajangiissalluni.

### Kapitali 13

*Suliarinninnernik qarasaasiakkut paasissutissanik akisussaasumit inuinnarmit  
ingerlanneqartunik nalunaarutiginnittarneq*

§ 48. Paasissutissanik qarasaasiakkut paasissutissanut akisussaasoq inuinnaq sinnerlugu suliarinninnissaq aallartitsinnagu qarasaasiakkut paasissutissanut akisussaasoq taassumaluunniit sinniisua Datatilsynimut nalunaaruteqaqqaassapput, taamaattorli tak. § 49.

*Imm. 2.* Nalunaarutiginninneq paasissutissanik § 43, imm. 2-mi allassimasunik imaqassaaq.

§ 49. Paasissutissanik suliarinninneq, pisut § 50, imm. 2-mi taaneqartut pinnagit, § 48-mi malittarisassani ilaatinneqassanngilaq

1) sulisut pillugit paasissutissat suliarinninnermi ilaatinneqarpata, paasissutissat § 7, imm. 1 aamma § 8, imm. 4-mi taaneqartut suliarinninnermi ilaatinneqanngippata,

2) sulisut peqqissusaat pillugu paasissutissat suliarinninnermi ilaatinneqarpata, peqqissuseq pillugu paasissutissanik suliarinninneq inatsimmi aalajangersakkat imaluunniit inatsit naapertorlugu malittarisassat aalajangersarneqartut eqquutsinnissaannut pisariaqartinneqarpata,

3) sulisut pillugit paasissutissat suliarinninnermi ilaatinneqarpata, ataatsimoortumik isumaqatigiissutip imaluunniit suliffeqarnermi ataatsimoortumik isumaqatigiissutip kingunerisaanik nalunaarsuinissaq pisariaqartinneqarpata,

4) sullitat, pilersuisut niuernermiluunniit attaveqarfiit allat pillugit paasissutissat suliarinninnermi ilaatinneqarpata, paasissutissat § 7, imm. 1 aamma § 8, imm. 4-mi taaneqartut ilaatinneqanngippata imaluunniit suliarinninnerit § 50, imm. 1, nr. 4-mi taaneqartut pineqanngippata,

5) niuernermit misissuinerit ingerlanneqarnissaat siunertaralugu suliarinninneq ingerlanneqarpata, paasissutissat § 7, imm. 1 aamma § 8, imm. 4-mi taaneqartut suliarinninnermi ilaatinneqanngippata,

6) suliarinninneq peqatigiiffimmit assigisaanilluunniit ingerlanneqarpata, peqatigiiffiup ilaasortai pillugit paasissutissat kisimik suliarineqarpata,

7) suliarinninneq eqqartuussissuserisunit imaluunniit kukkunerisuisunit, taakku suliamik ilaatut ingerlanneqarpata, sullitanut pissutsit pillugit paasissutissat kisimik suliarineqarpata,

8) suliarinninneq, nakorsanit, peqqissaasunit, kigutit nakorsaannit, kigutaasiortunit, nakorsaasiortunit, katsorsaanermi ikiortinit, kiropaktorinit inunnillu assigisaannit peqqissutsimut napparsimasunillu paarsinerup iluini suliaqarnissamut akuerisaasunit ingerlanneqarpata, paasissutissat taama suliaqarnermi taamaallaat atorneqassappata aamma paasissutissanik suliarinninneq napparsimmavik namminersortoq sinnerlugu ingerlanneqanngippata imaluunniit

9) suliarinninneq peqqissutsikkut iliuuseqarnikkut sullissinnermi atorneqartussatut ingerlanneqarpata.

*Imm. 2.* Inatsisinik atortitsinnermut ministeri suliarinninnerit imm. 1-imi taaneqartut pillugit malittarisassanik erseqqinnerusunik aalajangersaasinnaavoq.

*Imm. 3.* Inatsisinik atortitsinnermut ministeri suliarinninnerit allat § 48-mi aalajangersakkamit ilaatinnginnissaat pillugu malittarisassanik aalajangersaasinnaavoq. Taamaattorli suliarinninnerit § 50, imm. 1-imi ilaatinneqartut pineqanngillat, suliarinninnerit § 50, imm. 3 malillugu ilaatinneqanngikkunik.

§ 50. Suliarinninnermik § 48-mi nalunaaruteqartussaaitaanermut ilaatinneqartumik aallartitsinnginnermi Datatilsynimit akuersissummik pissarsiniartoqaqqaassaaq

1) suliarinninnermi paasissutissat § 7, imm. 1 aamma § 8, imm. 4-mi taaneqartunut ilaatinneqarpata,

2) nalunaarsorneqartup niueqatigiinnikkut attaveqarfiginissaata atorfinitsinneqarnissaataluunniit allanut aarlerisaarutigineqarnissaa siunertaralugu paasissutissanik suliarinninneq ingerlanneqarpata,

3) aningaasaqarnikkut patajaassutsimik akiligassarsisinnaassutsimillu naliliinissamut atugassanik paasissutissanik inuussutissarsiutinut attuumassuteqartumik ingerlatitseqqinnissaq siunertaralugu suliarinninneq ingerlanneqarpata,

4) atorfimmik inuttaliinissami inuussutissarsiutinut attuumassuteqartunit ikiorneqarnissaq siunertaralugu suliarinninneq ingerlanneqarpata imaluunniit

5) inatsisit pillugit paasissutissiisarnermi periutsinik ingerlatsinissaq kisiat siunertaralugu suliarinninneq ingerlanneqarpata.

*Imm. 2.* § 27, imm. 1 aammalu imm. 3, nr. 2-4 naapertorlugit nunanut allanut imm. 1-mi taaneqartutut paasissutissanik nuussinermi Datatilsynimut nuussinissaq pillugu akuersissummik pissarsiniartoqassaaq, suliarinninnerup § 49, imm. 1 naapertorlugu nalunaaruteqarnissamut ilaatinneqannginnera apeqqutaatinnagu.

*Imm. 3.* Imm. 1, nr. 1 aamma imm. 2-mi aalajangersakkanik malinninnginnissaq pillugu inatsisinik atortitsinermut ministeri aalajangersaasinnaavoq.

*Imm. 4.* Imm. 1 aamma 2-mi taaneqartut saniatigut nalunaarutiginnittussaaitaalluni suliarinninnermik allanik aallartitsinnginnermi nakkutilliisunit akuersissummik pissarsiniartoqaqqaarnissaanut malittarisassanik inatsisinik atortitsinermut ministeri aalajangersaasinnaavoq.

*Imm. 5.* Imm. 1, 2 imaluunniit 4 malillugit akuersissummik nalunaaruteqartoqarnermut atatillugu nalunaarsorneqartut inuttut inuunerisa illersorneqarnissaat eqqarsaatigalugu atugassarititanik erseqqinnerusunik nakkutilliisut aalajangersaasinnaapput.

§ 51. Paasissutissani § 48, imm. 2-mi, tak. § 43, imm. 2, taaneqartuni allannguutit aallartinneqannginneranni nakkutilliisunut nalunaarutigineqassapput. Aallannguutit annikinnerusumik pingaarutillit kingusinnerusukkut nalunaarutigineqarsinnaapput,

taamaattorli aallartinneqarnerannit kingusinnerpaamik sapaatip akunneri sisamat qaangiutsinnaagit.

*Imm. 2.* Paasissutissat § 43, imm. 2-mi taaneqartut allannguutaasa aallartinnginnerini suliarinninnernik nalunaarutiginninnernut § 48, imm. 2-mi, tak § 43, imm. 2, ilaatinneqartunut atatillugu nakkutilliisunit oqaaseqaammik pissarsiniartoqaqqaassaaq. Allannguutit annikinnerusumik pingaarutillit taamaallaat nalunaarutigineqassapput. Kingusinnerusukkut nalunaarutiginnittoqarsinnaavoq, taamaattorli aallartinneqarnerannit kingusinnerpaamik sapaatip akunneri sisamat qaangiunneranni.

## Kapitali 14

### *Aalajangersakkat allat*

§ 52. Qarasaasiakkut paasissutissanik suliarinnittartut Kalaallit Nunaanni ingerlataqartut aamma edb atorlugu sullissinnermik ingerlataqartut suliarinninnermik aallartitsinnginnerminni Datatilsynimut nalunaaruteqaqqaassapput.

§ 53. Suliarinninnerit §§ 43 aamma 48 malillugu nalunaarutigineqartut nakkutilliinnermut oqartussat allattussavaat. Paasissutissat § 43, imm. 2, nr. 1, 2, aamma 4-6-imi taaneqartut allattuiffiup minnerpaamik imarissavai, tamanillu takuneqarsinnaassallutik.

*Imm. 2.* Qarasaasiakkut paasissutissanut akisussaasup suliarinninnerit tamarmiusut, pineqartumut sullississutaasut pillugit paasissutissat, § 43, imm. 2, nr. 1, 2 aamma 4-6-imi taaneqartut, kikkunnut tamanut tamanna pillugu qinnuteqaateqartunut takusassanngortissavai.

*Imm. 3.* Paasissutissanik imm. 1-imi taaneqartunik kikkut tamarmik takunnissinnaanerit killilerneqarsinnaavoq, tamanna inatsisunik unioqqutitsinerit pinaveersaartinniarlugit, paasiniarniarlugit malersorniarlugilluunniit pisariaqarpat, imaluunniit inuttut namminerisamik soqutigisat illersornissaannut tamanna pisariaqartinneqarpat.

## **Immikkoortoq VI**

Nakkutilliineq inaarutaasumillu aalajangersakkat

### **Kapitali 15**

#### *Datatilsyni*

§ 54. Suliarinnineq sunaluunniit inatsimmut ilaatinneqartoq Datatilsynimit nakkutilliivigineqassaaq.

§ 55. Datatilsynip suliaassani arlaannaanulluunniit attuumassuteqanngilluinnarluni ingerlattarpai.

§ 56. Nalunaarutininik, kaajallaasitanik inatsisiniluunniit malittarisassanik nalinginnaasunik assigisaannik paasissutissanik suliarinninnermut atatillugu inuup namminerisamik inuunerata illersorneqarnissaanut pingaarutilinnik suliarinninnermi Datatilsynimit akuersissummik pissarsiniartoqartassaaq.

§ 57. Inatsit aamma malittarisassat inatsit manna naapertorlugu aalajangersarneqartut malillugit suliarinnineq ingerlaneqarnerisooq Datatilsynip nammineq piumassutsini malillugu nalunaarsorneqartulluunniit naammagittaalliuuteqarneratigut nakkutigissavaa.

*Imm. 2* Inunnik paasissutissat § 27, imm. 5-imi pineqartut nuunneqarnissaat immikkut ittunik pisoqartillugu nakkutilliisuutit inerteqqutigisinnaavaat imaluunniit atorunnaarsikkallarsinnaallugit.

§ 58. Qarasaasiakkut paasissutissanik akisussaasoq inuunnaq suliarinninnermik inatsit manna malillugu ingerlateqqusaanngitsumik unitsitseqqullugu aamma

paasissutissat aalajangersimasut taama suliarinninnermut ilaatinneqartut iluarsineqarnissaannik, peerneqarnissaannik mattunneqarnissaannilluunniit Datatilsynimit peqquneqarsinnaavoq.

*Imm. 2.* Qarasaasiakkut paasissutissanik akisussaasoq inuinnaq paasissutissanik suliarinninnermut atatillugu periutsimik aalajangersimasumik nakkutilliisut atueqqunngissinnaavaat, periuseq pineqartoq inatsimmik unioqqutitsilluni paasissutissanik suliarinnittoqarsinnaaneranut annertuumik navianaateqartoq nakkutilliisut isumaqarfigippassuk.

*Imm. 3.* Paasissutissat suliarineqaqqussaangitsut suliarineqarsinnaanerannut, paasissutissat nalaatsornikkut inatsisinilluunniit unioqqutitsilluni suujunnaarsinneqarsinnaanerannut, annaaneqarsinnaanerannut ajorseriaateqartinneqarsinnaanerannulluunniit aamma susassaqaangitsunit takuneqarsinnaanerannut, atornerlunneqarsinnaanerannut allatulluunniit inatsisinut akerliusumik suliarineqarsinnaanerannut teknikikkut aaqqissuussaaniikkullu isumannaallisaatinik aalajangersimasumik aalajangeeqqullugu qarasaasiakkut paasissutissanut nakkutilliisoq inuinnaq nakkutilliisunit peqquneqarsinnaavoq.

*Imm. 4.* Pisuni immikkut ittuni qarasaasiakkut paasissutissanik suliarinnittartut nakkutilliisunit peqquneqarlutik nalunaarfigineqarsinnaapput imaluunniit inerteqqummik nalunaarfigineqarsinnaapput, tak. Imm. 1-3.

§ 59. § 7, imm. 7, § 9, imm. 3, § 10, imm. 3, § 13, imm. 1, § 27, imm. 4, §§ 28-31, § 32, imm. 1, 2 aamma 4, §§ 33-37 kiisalu § 39 pillugit sulianik oqartussaasumut pineqartumut Datatilsyni aalajangiisarpoq.

*Imm. 2.* Pisuni allani qarasaasiakkut paasissutissanut akisussaasutut oqartussaasumut nakkutilliisut oqaaseqaateqartarput.

§ 60. Inatsit manna malillugu Datatilsynip aalajangigai allaffissornikkut oqartussaasunut allanut suliassanngortinneqarsinnaanngillat.

§ 61. Datatilsyni paasissutissamik sumilluunniit ingerlataminut pingaaruteqartumik, tassunga ilanngullugu pissuseq inatsimmi aalajangersakkanut ilaanersoq pillugu aalajangiinissamut pingaaruteqartumik paasissutissinneqarnissaminik piunasaqarsinnaavoq.

*Imm. 2.* Ininut tamanut pisortat ingerlatsiviat sinnerlugu suliarinniffiusunut, aqutsiviusunut imaluunniit paasissutissanik suliarinninnermut atorneqartunik pissarsiviusinnaasunut aamma ininut paasissutissanik imaluunniit teknikikkut

atortulersuutini uningatsiviusunut atuiffiusunulluunniit nakkutilliisuni ilaasortat sulisullu kinaassutsimik uppersaat pisariaqartoq atorlugu eqqartuussivik aalajangiiseqqaarnagu sukkulluunniit isersinnaatitaapput.

*Imm. 3.* Imm. 2-mi aalajangersagaq taamaqataanik atuuppoq suliarinninnernut qarasaasiakkut paasissutissanut akisussaasunit inuinnarnit ingerlanneqartunut, suliarinninneq § 50-imi ilaatinneqartillugu.

*Imm. 4.* Aamma suliarinninneq qarasaasiakkut paasissutissanik suliarinnittartumit § 52-imisut taaneqartumit ingerlanneqartoq eqqarsaatigalugu imm. 2-mi aalajangersagaq atuuppoq.

**§ 62.** Inatsit manna tassanilu allannguutit malillugit nalunaaruteqarnerit akuersissutinillu qinnuteqaatit aalajangersimanerusumik iluseqartillugit tunniunneqarsinnaasut tunniunneqassasulluunniit Datatilsynimit aalajangerneqarsinnaavoq.

*Imm. 2.* Inatsit manna malillugu nalunaarutini akuersissutinillu qinnuteqaatinik makkuninnga tunniussinermi 2.000 kr.-inik akiliisoqassaaq:

- 1) § 48 naapertorlugu nalunaaruteqarnerit.
- 2) § 50 naapertorlugu akuersissut.
- 3) § 52 naapertorlugu nalunaaruteqarnerit.

*Imm. 3.* Imm. 2, nr. 1 aamma 3-mi taaneqartutut nalunaarut akiliisoqareerpat tunniunneqartutut aatsaat isigineqalissaaq. Imm. 2, nr. 2-misut taaneqartutut akuersissutip akiliisoqqaartinnagu nalunaarutigineqarnissaa Datatilsynimit aalajangerneqarsinnaavoq.

*Imm. 4.* Imm. 2, nr. 1 aamma 2-mi aalajangersakkat suliarinninnernut ilisimatusarnermik kisitsisitigulluunniit paasissutissiornermik taamaallaat siunertaqarluni ingerlanneqartunut atuutinngillat.

*Imm. 5.* Suliarinninneq § 48 malillugu nalunaarutigineqarlunilu § 50 malillugu akuersissutigineqarpat akiliut ataasiinnaq akilerneqassaaq.

**§ 63.** Datatilsynip nammineq aalajangigaanik imaluunniit naalagaaffiup ilaasortaasup allap qinnuiginninneranit paasissutissanik suliarinninneq Kalaallit Nunaanni ingerlanneqartoq inatsisinut naapertuunersoq nakkutigineqarsinnaavoq, suliarinninnerup pineqartup naalagaaffimmi Den Europæiske Unionimi ilaasortaasumi

inatsimmi ilaatinneqarnera apeqqutaatinnagu. §§ 55 aamma 61-imi aalajangersakkat assinganik atuupput.

*Imm. 2.* Aammattaaq naalagaaffinni Den Europæiske Unionimut ilaasortaasuni nakkutilliinermik oqartussaasunut paasissutissanik Datatilsyni ingerlatitseqqissinnaavoq, taamaaliornissaq inatsimmi matumani aalajangersakkat imaluunniit naalagaaffiup ilaasortaasup paasissutissanik illersuisarneq pillugu inatsit malinneqarnerseq pillugu nakkutilliinissamut pisariaqartinneqarpat.

## Kapitali 16

*Taarsiissuteqarnissamik akisussaaffik pinerluttulerinermilu inatsimmut atatillugu akisussaaffik*

§ 64- Inatsimmi matumani aalajangersakkanik unioqutitsilluni suliarinninnerni ajoqusikkanut qarasaasiakkut paasissutissanut akisussaasoq taarsiissuteqassaaq, taamaaliortoqassananilu paasissutissanik suliarinninnermut atatillugu mianersornissaq peqqissaarnissarlu piumasagaataasut aqqutigalugit ajoquserneq pinngitsoortinneqarsinnaasimanngitsoq uppersararneqarsinnaappat.

§ 65. Suliarinninnermut inuiannaat sinnerlugit ingerlanneqartumut atatillugu,

1) § 4, imm. 5, § 5, imm. 2-5, § 6, § 7, imm. 1, § 8, imm. 4, 5 aamma 7, § 9, imm. 2, § 10, imm. 2 aamma 3, oqaaseqatigiit siulliit, § 11, imm. 2 aamma 3, § 12, imm. 1 aamma imm. 2, oqaaseqatigiit siulliit, § 13, imm. 1, oqaaseqatigiit siulliit, §§ 20-25, § 26, imm. 1, imm. 2, oqaaseqatigiit aappaat, aamma imm. 3, § 27, imm. 1, § 28, imm. 1, § 29, imm. 1, § 31, §§ 33 aamma 34, § 35, imm. 2, §§ 36 aamma 37, § 39, imm. 1 aamma 3, § 41, imm. 1 aamma 3, § 42, § 48, § 50, imm. 1 aamma 2, § 51, § 52 imaluunniit § 53, imm. 1-imi unioqutitsisoq,

2) Datatilsynip § 5, imm. 1, § 7, imm. 7, § 13, imm. 1, oqaaseqatigiit aappaat, § 26, imm. 2, oqaaseqatigiit siulliit, § 27, imm. 4, §§ 28 aamma 29, § 30, imm. 1, § 31, § 32, imm. 1 aamma 4, §§ 33-37, § 39 imaluunniit § 50, imm. 2 malillugit aalajangigaanik malinninngitsoq,

3) Datatilsynip § 61, imm. 1 malillugu piumasagaataanik malinninngitsoq,



4) § 61, imm. 3 aamma 4 malillugit Datatilsynip paasitinneqarsinnaanerani akimmisaartitsisoq,

5) § 7, imm. 7, § 9, imm. 3, § 10, imm. 3, § 13, imm. 1, § 27, imm. 4, § 50, imm. 5-imi taaneqartut atugassarititaasunik imaluunniit piunasaqaatinik imaluunniit inatsit naapertorlugu malittarisassat aalajangersarneqartut naapertorlugit akuersissummut atugassarititaasunik sumiginnaasoq imaluunniit

6) inerteqqutinik peqqusinnginnernilluunniit § 58 naapertorlugu nalunaarutigineqartunik malinninngitsoq pinerluttulerinermik inatsit malillugu pineqaatissiissumik eqqartuunneqarsinnaavoq.

*Imm. 2.* Aamma tamanna atuuppoq inunnut pisortat ingerlatsiviat sinnerlugu suliarinninnerminnut atatillugu § 41, imm. 3, imaluunniit § 52-imi unioqqutitsisumut imaluunniit § 7, imm. 7, § 9, imm. 3, § 10, imm. 3, § 13, imm. 1, § 27, imm. 4-mi taaneqartut atugassarititaasunik imaluunniit inatsit naapertorlugu malittarisassat aalajangersarneqartut naapertorlugit akuersissummut atugassarititaasunik sumiginnaasoq.

*Imm. 3.* Aammattaaq naalagaaffimmi Den Europæiske Unionimi ilaasortaasumi inatsit malillugit suliarinninnermut atatillugu Datatilsynip § 58 malillugu aalajangigaanik malinninngitsoq imaluunniit Datatilsynip § 61, imm. 1 malillugu piunasaqaataanik malinninngitsoq imaluunniit § 61, imm. 3 aamma 4 malillugit Datatilsynip takunnissinnaanerani akimmisaartitsisoq eqqartuunneqassaaq.

*Imm. 4.* Inatsit naapertorlugu malittarisassanik aalajangersarneqartunik unioqqutitsisoqartillugu pinerluttulerinermik inatsit malillugu pineqaatissiissumik eqqartuussisoqarsinnaavoq.

*Imm. 5.* Ingerlatseqatigiiffiit il.il. (inatsitigut inuttut naatsorsuussat) pinerluttulerinermi inatsimmi kapitali 5-imi malittarisassat malillugit pinerluttulerinermi inatsit malillugu akisussaatinneqarsinnaapput.

**§ 66.** Inuk § 50, imm. 1, nr. 2-5 imaluunniit § 52-imi taaneqartut ingerlatsisoq suliaqartorluunniit pinerluttulerinermik inatsimmi unioqqutitsinerminut eqqartuunneqarnermigut taama suliaqarsinnaatitaanermik arsaagaasinnaavoq, unioqqutitsineq iliuuserineqartoq atornerluinissamut navianartorsioratartitsisinnaasutut isigineqarpat. Aamma pinerluttulerinermik inatsimmi § 165, imm. 3 aamma 4 atorneqarsinnaapput.

## Kapitali 17

*Inaarutaasumik aalajangersakkat, tassunga ilanngullugit atuutsitsilernermut aalajangersakkat il.il.*

§ 67. Pisortat ingerlatsiviat sinnerlugu sulianik ingerlanneqartunut malittarisassanik erseqqinnerusunik ministeri pineqartoq pisuni immikkut ittuni aalajangersaasinnaavoq.

§ 68. Suliarinninnernut qarasaasiakkut paasissutissanut akisussaasut inuinnaat sinnerlugit ingerlanneqartunut aalajangersimasunut atatillugu, tassunga ilanngullugit paasissutissat aalajangersimasut suliarineqarsinnaannginnerat pillugu inatsisinik atortitsinermut ministeri malittarisassanik erseqqinnerusunik aalajangersaasinnaavoq.

§ 69. Sulianut atatillugu peqatigiiffiit ingerlatsiviillu allat qarasaasiakkut paasissutissanut akisussaasunut inuinnarnut allanut sinniisuusut pissusilersortarneq pillugu malittarisassanik allassimangitsunit katersukkanik inatsimmi matumani malittarisassanik eqqortumik atuinissamut ikorfartuutaasussanik Datatilsyni suleqatigalugu suliarinnissinnaapput.

§ 70. Peqqussut ulloq 1. marts 2016-imi atuutilissaaq.

*Imm. 2.* Malittarisassat inatsit malillugu aalajangersarneqartut Kalaallit Nunaanni atuutsinngillat.

*Imm. 3.* Inuinnaat nalunaarsorneqartarnerat il.il. pillugit inatsit nr. 293, 8. juni 1978-imeersoq atorunnaarsinneqarpoq. Pisortani oqartussaasut nalunaarsuiffii pillugit inatsit nr. 294, 8. juni 1978-imeersoq peqqussutip atuutilerneranit taamaallaat eqqartuussivinnut atuutissaaq.

*Imm. 4.* Naammagittaalliuutit nakkutilliinermiluunniit suliat peqqussutip atuutilinnginnerani pilersinneqartut malittarisassat maannamut atuuttut malillugit naammassillugit suliarineqarsinnaapput. Oqartussaaffik malittarisassat makku malillugit Registertilsynimit (nalunaarsuiffinnik nakkutilliisoqarfimmit) ingerlanneqartussaaq Datatilsynimit ingerlanneqassaaq.

*Imm. 5.* Suliassat inatsit malillugu Registertilsynimit ingerlanneqartartut

Datatilsynimit aamma ingerlanneqassapput.

§ 71. Suliarinninnerit inuinnaat sinnerlugit ingerlanneqartut aamma peqqussutip atuutilinnginnerani aallartinneqartut eqqarsaatigalugit kapitali 13-imi malittarisassat kingusinnerpaamik 1. marts 2019-imi eqquutsinneqarsimassapput.

*Imm. 2.* Suliarinninnerit pisortat oqartussaasui sinnerlugit suliarineqartut aamma peqqussutip atuutilinnginnerani aallartinneqartut eqqarsaatigalugit kapitali 12-imi malittarisassat kingusinnerpaamik 1. marts 2019-imi eqquutsinneqarsimassapput.

*Imm. 3.* Suliarinninnerit peqqussutip atuutilinnginnerani aallartinneqartut peqqussutip atuutilernerata kingorna akuersissuteqaqqaarnani ukiuini 3-ni ingerlateqqinneqarsinnaapput.

*Imm. 4.* Peqqussutip atuutilerneranit ukiuini 3-it qaangiutsinnagit § 52-imi aalajangersagaq malillugu nalunaarutiginnittoqassaaq.

*Imm. 5.* Inatsisinik atortitsinermut ministeri Kalaallit Nunaanni Namminersorlutik Oqartussanik isumaqatiginninniarnepup kingorna piffissaliussap imm. 1 aamma 2-mi taaneqartup sivitsorneqarsinnaanera pillugu malittarisassanik aalajangersaasinnaavoq.

*Imm. 6.* Suliarinninnerit peqqussutip atuutilinnginnerani aallartinneqartut immikkoortoq II-mi suliarinnittarnermut malittarisassat apeqqutaatinnagit ingerlaannarsinnaasut nakkutilliinermik oqartussaasut pisuni immikkut ittuni qinnuteqartoqarneratigut aalajangersinnaavaat.

§ 72. Malittarisassat maannamut atuuttut naapertorlugit akuersilluni nalunaarut suliarinninnernut inatsisip atuutilernerata kingorna aallartinneqartunut atuuppoq, inatsimmi matumani § 6, nr. 1, § 7, imm. 2, nr. 1, § 8, imm. 2-5, § 11, imm. 2, nr. 2, imaluunniit imm. 3, imaluunniit § 27, imm. 3, nr. 1-ip saniatigut § 3, nr. 8-mi piumasaqaat akuersilluni nalunaaruteqarnermi eqquutsinneqarsimappat.

1) Aalajangersagaq ima oqaasertaqarpoq: "Inatsit Savalimmiunut atuutinngilaq, kunngilli peqqussutaatigut naalagaaffiup oqartussaasuisa paasissutissanik suliarinninnerannut atuutsinneqalersinnaalluni Savalimmiuni pissutsit immikkut ittut pissutaallutik allaanerussutaasinnaasut tunngavigalugit. Inatsit Kalaallit Nunaannut aamma atuutinngilaq, kunngilli peqqussutaatigut Kalaallit Nunaanni pissutsit immikkut ittut pissutaallutik allaanerussutaasinnaasut tunngavigalugit atuutsinneqalersinnaalluni"